

Pablopa Romanodenidsa ima teppe dosse inajaro Romanos

Pablopa Romahuaji madimanajari Jesodsa toquejenaridenidsa ima teppe dsodo inajaro. Puhuapa nahihuaji tocca-jaraccadsa pohuadenidsa dsodo inapojaro. Puhuadeni qquide, pohuadeni maride tohuini naraha dsotodena pohuadenihuaji toccajari. Dsotodena pocca benehicca imapi Roca dsodo inajaro (Tahimarideni capitulos 27–28).

Romahuajicca madija mota huapi taha jodio quejenarajarideni. Poccadeni odsa panani deni tojanicca, bica taniccapi Roma. Najaro odsa pananicca madijapa jodiodenicca dsama cacahuade toquejenaridsajari.

Romacca madija motapa Jeso tahimari mittamanadsa pajissa quinajari. Nadsapa Dio jipa tahiccassa inamananijine, poccadeni ima Diodsa bica tanijine Pablo pohuadenidsa dsodo inajaro.

Romanodenidsa Pablo attipa: —Moisesicca marinajadsa iboraqquri tiquinadsapi ticassiejera-jeranitohui. Najarodsa timadimanadsapi ticcadeni ima Diodsa pajiranissa tanijine ssamo tani. Jesocristodsa pajissa tiquinadsana Dio tiadeni tonassiajabaqquihitohui —najari Pablo pocca ima teppedsa.

Pablo nija najari

¹ ¿Nija ohuemecotedeni? Ohuapi Pablo, Jesocristocca medse, tiadenidsa occa ima dsodo onajaro. Jesocristocca dodosse ojanijinepi Dio otohui huahua najaride. Najaroa

aji pocca ima bicani madija tocassiejerahijinecca mari mari ohocanabaququiridsa nahijine omadijaro.

² Maittaccadsama najaro imapi Diojine Pohua Atti comeraququiri najarideni huati toquinapojari. Pohua Atti dsodo nanidsapi anini. ³ Najaro ima bicanipi aja Dio Pohua Bedi Jesocristo tahimari. Pina madija bedissa naha tossonajaripa tamine Dabi potemahidsana tossonajari.

⁴ Dio Corimejinena Jesocristocca ima ahuato inanajaro. Jeso dsoququedsapa Dio pocca dacorehema inahatonijari. Najarojinena ima ahuato tajaro: Ia Medsede Jesocristopa Dio Bedi.

⁵ Najarina ohuadsa huati huana tadsa ohua cadossejari, dsama huapimacca madija pohua oni mittaridsamanahijine. Ohuattipi: —Jesocristodsa pajissa tiquinanissa taji. Pocca marinajadsa iboraququiri tiquinaji —ohonaridsa nanijine ohua cadossejaride. ⁶⁻⁷ Romahuaji timadimanajaro tiadenidsa naqui Jesocristo tahimari bacco tajaro. Dio titohuideni huati cahanari canadsapa Jesocristocca madija tiquejenanijine titohuideni huahua najaride. Aja icca Abi Dio, ia Medsede Jesocristo tedseje tiadenidsa ima bicani inanamana-dsanapona, onajaro. Icca Abi Diocca jonehe naqui tiadenidsa tojadsanapona. Ia Medsede Jesocristocca jonehe naqui tiadenidsa tojadsanapona, onajaro.

Pablopa: —Romahuaji occana —najari

⁸ Jehe, tahide titohuideni Jesocristo onima Diodsa huati huati ohonanadsapi: —Jehe Abi Dio, epejeni. Tijine bicaququiri nahi —ohonanajaro. Ia Medsede Jesocristodsa jehe tiquinadsa pohua attidsa iboraququiri tiquinadsapi titahimarideni huati huati quiquinanahi ohomittaridsa najaro. Dsama huapimacca madija attideni: —Romanodenicca jehenijipi dacorani —nanaridsamana nahi omittadsa titohuideni Diodsa huati huati

ohonanajaro. ⁹ Obodi ohuassirema Diodsa odsepe ihiji najaro. Pohua Bedi tahimari icassiejeranijinecca maride dissera onajaro. Diopa occa ima qqui tahi, nahato tahi. Najaroa titohuideni Diodsa huati huati ohodsanapo najaro. ¹⁰ Tiadeni qquide occanijine Diodsa huati huati ohonanaraha jehe najaraccahi. Dio ohuattidsa jehe nadsapa nidsa tiadenihuaji bacco onanitohui. ¹¹ Tiadeni qqui onabaquiniijine tohuini onani. Tiadenidsa Dio Atti ohuacomeradsapi Pohua Corimejine Pohuadsa jehe tiquinajaro todacorani nanijine, onajaro. ¹² Aji tiadeni Jesocristodsa jehe tiquineje, ohuassa Jesocristodsa jehe oneje nadsapi tiadeni tedseje icatidserara cananijine, onajaro.

¹³ Ohuemecotedeni, nahatoqquiri tiquinanijine onadsa huajijiradsa ohuapi nani occanijine occa benehi ohonajora naraha occa benehi huajijiradsa tossamo tossamo dsanaponi. Nidsa tiadenihuaji occadsa tiadeni mari ocanabaquidsapi ticcadeni madija ohuaha naco Jesocristodsa toquejenahijine, onajaro. Ajana jodio quejena-jarajarideni dsama onihihujicca, dsama onihihujicca mari ocanabaquirdsapodsapa Jesocristodsa toquejenana canade. Tiadenihuaji ima najarossa nanijine jipa onajaro. ¹⁴ Jesocristo otohui huahua najaripa: —Madija dsama huapimacca otahimari mitta-manahijine maride ticcaridsaji —najaride. Nadsapi pina odsa pananidsa madimanajaridenidsa, dsama dope-dsa madimanajaridenidsa naco pohua tahimari mitta-manahijine maride occaridsajaro. Aja papeo nahatoqquiri najaridenidsa, papeo ssamoqquiri najaridenidsa naqui Jesocristo tahimari mittaridsamanahijine maride onebo-jerajaro. ¹⁵ Najarojinea Romahuaji timadimanajaro naqui Jesocristo tahimari icassiejeranijinecca tiadeni mari ocanabaquiniijine jipa onajaro.

Jesocristo tahimarina dacorabote ojarini

¹⁶ Ohuapi Jesocristo tahimari icassiejeranijinecca ohuacomeranijinepi ocappina-jerajaro. Ohuapi nahato onani: Jesocristo tahimaripa Diocca dacorehe madija tocassiejerahijine, onajaro. Tahidepi jodiodenidsa, dsotodepa jodio quejena-jarajaridenidsa naco Jesocristo tahimari dacorajaro. Huapima najarodsa jehe quinadsapa tocassiejerahijine. ¹⁷ Aji Jesocristo tahimaridsana Dio ia tonanabica-baqquihijinecca ima ahuato tajaro. Jesocristodsa pajissa inadsapi pohua tahimarijine imasiri inanajaro manaconipi jicani. Icca jeheniji najaro ojarijaropi Jesocristo tahimari iadsa tojajaro. Dio Atti dsodo nanidsa ajima najaro: —Madija bica tajari Diodsa pajissa najaripa najaro jehenijima madi-dsanapohuitohui —nahi nade Dio.

Madija huapima ima inanamanani ahuato tajaro

¹⁸ Madija imasiri totonanadedeni cajiridsahi. Nidsa Diocca najidsohue oppinabote memehuaji ccaronadsa pohuadenidsa ssonarinitohui. Najaridenipa poccadeni tabaccorehejine pajissacca ima tocahattehijine ssamoqqiri nahi. ¹⁹ Dio tahimaripi ahuatoridsajaro. Pohuadenidsa naqui ahuato tani. Djojine pohuadeni bodi nahatoqqiri najari. ²⁰ Diopa innocodsa qqui inajarahi. Pocca ima naqui innocodsa qqui inejeraraha dsama Dio inahatoponidsama pocca dacorehe jiquejeranicca, pocca deni tojehe huapimadsa ahuatojonajaro. Pocca nahatohue qqui inaridsajaropi najaro imadsa ibodi huahuatoma nadsapi Diocca ima iadsa ahuato tajaro. Naraha madija imasiri tohui quinajaridenipa: —Dio tahimari iadsa ahuato tejerani —quiquinanaraha pohuama maid-samanajari. ²¹ Pohuadenipa Dio Pohuadsa bodideni nahatoqqiri naraha Diodsa: —Bica tinani, deni tijani

—quiquinana-jarajari. —Epejeni. Tijine iadsa ima bica tani —quiquinana-jaradsa naco pohuadeni bodipa ima ponimaccadsara toquejenaridsajari. Bodideni tossamoridsadsapa dsidsinidsa toquejenajari. ²² Attidenipa: —Nahatojide ojirajaro —quiquinanaraha ssamoqquri nahi. ²³ Madijapa huatia tahi. Naraha Diopa huatiehera tajari. Pocca deni tojehe huapimadsa ahuatoto taraha Pohuadsa jehe quina-jaradsapa madija huatiahaqquri najarideni corime inahatomanadsa najaridsana: —Ia cacahuade —quiquinanajari. Aja bani eppe cajihi corime naco inahatomana, namidsa jajahiridsa najari aja biji caji isso caji najarideni corime inahatomana, pohuadeni baccodenidsa jajahiridsa najari corime naco inahatomana nadsa poccadeni nahatonajadsa: —Ia cacahuade —quiquinanajari.

²⁴ Najarojinea Dio inebobaqqujari. Pohuadeni bodidsa tabaccorehe tohuini quinadsapa huananehecca imadsa toquejenajari. Pohuadeni tesse tedseje huananehe oppina tanicca inanamanajaro. ²⁵ Diocca imapi pajissacaraha Diocca imadsa huattajojo tajari. Maidsehetohuira disseraqquri najari. Dio inahatoridsajari corime inahatomanadsa najaridsa huahuatidsemana nadsapa: —Ia cacahuade —quiquinanajaripaja. Pohuadeni Nahatode Diodsara huatidsemanahijine bica taraha nama quina-jarajari. Pohuadsa: —¡Bica tinani, deni tijani! —ihid-sanapo nanijine bica tani. Pajissa nema nana.

²⁶ Naraha madija pohuadeni cacahuade ohuahadsa disseraqquri nadsapa Dio inebobaqquidsa poccadeni huananehe oppina tanicadsa toquejenajari. Aji amoneje ponidenicca maqqi najade jiperaqquri najaropi ponidenira ima oppina tanicca inanamanajaro. ²⁷ Maqquideje naco poccadeni amoneje ajade jiperaqquri najaripa pohuadeni tesse tedseje ima oppina tanicca inanamanajaro. Najaro imadsa disseraqquri nadsapa

poccadeni ima oppina tajaro. Nama quinadsapa pohuadeni imedsa comani ihinahanamana najaropaji, poccadeni huananehe manaconi.

²⁸ Diodsa bodideni huatohuijine jiperaqqiri nadsa Dio Attipa: —Apajana. Pohuadeni bodi pohuadeni tohuini quinadsapa nama naha madimana-dsanapohuijine —najari. Najaria madija huapima ima bica tejeranicca inaridsamanajaropaji. ²⁹ Najaria madija pohuadeni bodidenidsa imasiri sseqqiri naha madimana taja, imasiri inanamanadsa huatidsemana taja najari. Poccadeni dacorehema: —Ohuana denima ocajina —quina taja, —Madija ohuahacca ima onatabaccorana —quina taja najari. Pohuadenipa madija ohuahacca deni tojehe acconi bodideni huadiqqiri najari. Pohuadenipa madija inanadsosqqemana tahi. Amadsati naco cahadire tahi. —Icamaidasabaqqina —quina tahi. Tabaccorehe denima tabaccora tanicca tohuini quina tahi. Pahuama madija ohuahacca ima ahuatoranidsa huati iqquimamana tani. ³⁰ Madija ohuahadenicca ima totabaccoranijine huatijidede raja, Diodsa jiperaqqiri naja najari. Madija ohuahadsa attideni bica tajaradsa atti atti quina taja, madija ohuahadenipa: —Iana bicaqqiri inajaro —quina taja, madija ohuahadenipa: —Iana deni iquejenani —quinajari huati huatijidede raja najari. Pohuadeni bodidsa ima tabaccora tanicca inahatomana teje, imehideni attidsa naco iboqqiri naja najari. ³¹ Pohuadenipa ima bicani mittamanahijine jiperaqqiri najari. Pohuadeni attipa: —Tiadenidsa nabica onanitohui —quiquinanaraha maimaidsamana najari. Poccadeni madijadsa naco huatideni huanaqqiri najarahi. Madija ohuahadsa naco huatideni huanaqqiri najarahi. Huadiecca naco huatideni ssonaneraqqiri najari. Poccadeni madijacca ima tossamodsanaqui: —Tia acco ocamana —quina-jarahi. ³² Madija nama

quinajaridenipa Dio Atti mittamanaporaha. Aja Dio Attia: —Imasiri inanamanajarodenipa paja jicarihitothui —nahi nahatoqquiri najari. Naraha pohuadeni cacahuamanajaradsapa imasiri inanamana-dsanapojaro. Madija ohuahadeni imasiri inanamanani qqui toquinadsa naco: —Jehe, bica tani —quiquinanajari.

2

Diopa madijacca ima cattemade tojadsapa pajissara huati tahitohui

¹ Imasiripi ajima nani onadsa tiadenidsa dsodo onajaro, nani nahatoqquiri tiquinanijine. Madija ohuahadsa: —Ticcadeni ima tabaccora tani —tiquinadsapi tijinedeni ticcadeni imasiri ahuate tanitohui. ¿Nejecotohui madija ohuahacca imara huati huati titiquina najaro? Najaro imassa tinanamanajarojine Diocca najidsohue tiadenidsa ssonarinitohui. ² Madija ima inanamanadsapi Dio Attipa: —Tijinedeni ima tabaccora tani —najari. Nadsapa pohuadeni inajidsobaqquihitothui. Iapi nahatoqquiri inani: Diopa poccadeni ima nahato tajaria pajissara huati tajari. ³ Naraha ticcadeni imapi ¿nejecoma nejecoma najaro? Tiadenipi: —Madija ohuahacca ima bica tejerani, Dio inajidsohuitohui —tiquinaraha tiadeni naqui pina pocca imassa tinanamanadsapi ¿Diocca najidsohue dsori ticanirepadseje? Dsori ticanire-jeranitohui. ⁴ Diopa tiadenidsa huati huana tajari. Biquehe huapi tanicca tiadenidsa inanaridsajaro. Dio Pohuadsa pajissa tiquinanijine tinajomanadsa naqui titohuideni denima madicajari. Naraha najaro ima huapimapi tiadenidsa pina ponimassa najaro. Aji Djotine ima bicani tiadenidsa toजारopi tibodideni cacajiquimeranijine. ⁵ Naraha tiadenipi Diodsa iboqquiri tiquinajaro. Tibodideni cacajiquimeranijine jiperaqquiri tiquinadsapi ticcadeni

imasiri manaconi najidsohue onihi onihi nehe tinehemamanajaro. Nidsa dsotode Diocca huadie tojanijinecca huada bacco tadsapi tiadenidsa najidsohue ssonarinitohui. Dio Pohua tedsejema tidomo huadsa Dio ticcadeni ima manaconi inapajiranissa tani ahuato inananitohui.

⁶ Nidsa Diopa huapimadsa poccadeni ima manaconi pohuadenidsa da inanitohui. ⁷ Madija ima bicani inamanajarodenidsapa Dio pocca camittehe jiquejeranicca da inaridsanitohui. Pohuadenipa Diocca deni tojehetohui madimanajari. Pohuadenidsa Dio: —Occa ejedenideni, bicaqqiri tiquinani —nahijine tohuini quinajari. Camittehe jiquejeranicca tohuini naco madimanajari. ⁸ Naraha madijapa poccadeni ima tohuinira disseraqqiri najaridenidsana Diocca huadie ssonarinitohui. Najaridenipa Diocca ima pajissaccadsa iboqqiri najari. Tabaccorehena pohuadenidsa bica tajararo. ⁹ Tabaccorehe inanamanajaro huapimapa najidsohue tonahanamanahitohui, ocasserehe tonahanamanahitohui. Jodiodenidsa, jodio quejena-jarajaridenidsa naqui ssonarinitohui. ¹⁰ Naraha ima bicanira inanamanajaro deni huapimadsana Dio pocca deni tojehe inananitohui. Pohuadenidsa: —Occa ejedenideni, bicaqqiri tiquinani —nahitohui. Pocca jonehe naqui pohuadenidsa tojanitohui. Jodiodenidsa, jodio quejena-jarajaridenidsa naco nama nahitohui. ¹¹ Dio Pahuadsa jodiodenicca ima, jodio quejena-jarajaridenicca ima tadsajanipi najarossa caniquimerajaro. Jodiodenidsara denima huati huana tahi ojari najarahi.

Diojine jodio quejena-jarajari bodideni nahatoqqiri inabaqqipojari

¹² Nidsa dsama jicanijinecca huadadsana Diopa madija huapimacca ima icattemanitohui. Diocca

dosseniji Moisesidsa da inajaro cappiramanaha madimanajaridenicca imapi Moisesicca marinajadsa icattema-geranitoahui. Naraha imasiri inanamanajarojine paja dsoqquemanarihihuaji najidsohue tonahanamand-sanapohuitoahui. Moisesicca marinaja cajimanajari-denipa najaro marinajadsa imarideni icattemanitoahui. ¹³ Aja madija Moisesicca marinaja mittamanaraha pina najarossa inanamana-geradsapi Diodsa tobicamanajarajari. Diopa pohnadenidsa: —Imasiri ticajimanani —najari. Naraha Moisesicca marinaja mittamanajarideni pina najaro marinajassa inanamanadsapi Diodsa tobicamanajari. Diopa pohnadenidsa: —Imasiri ticappiramanani —najari.

¹⁴ Naraha jodio quejena-jarajaridenipa Moisesicca marinaja cappiramanaraha pina najarossa inanamanadsapi pohnadenidsa ajijaro ima ahuato tajaro: Djoline bodideni nahatoqqiri najari. Pohnadenipa bodideni huatomanahissa tadsapa ima bicani nahatoqqiri nahijine. ¹⁵ Nadsapi poccadeni madiesa ima ahuato tajaropi pohnadeni bodidsa Diocca dosseniji cajimanajari. Bodideni huatomadsapa ima bica tanicca nahatoqqiri, ima tabaccora tanicca nahatoqqiri najari. ¹⁶ Nidsa Dio madijadenicca ima nattome inabaqquihijinecca huada bacco tadsana Jesocristo idossehitohui. Nadsana madija bodidenidsa ima ecomamanajaro Jeso ahuato inananoitohui. Najaro ima tojanijinepi Jesocristo tahimari icassiejeranijinecca mari mari ohonanajarodsa huati huati onapode.

Jodiodenipa Moisesicca marinaja cajimanaraha

¹⁷ Jodiodeni mota tettidenipi: —Iapi jodio iquejenani. Diocca dosseniji Moisesidsa da inajaropi icajini. Icca Diona deni tojajari. Pohnana ia tocattejid-sabaqquijari —titiquina najaro. ¹⁸ Tettidenipi: —Iapi Dio Pohua jipa

tahicca nahatoqquri inajaro. Moisesicca marinajajine ima bicani icattejidsanijine naqui icahatterani —titiquina najaro. ¹⁹ Tettideni naqui: —Iapi Dio Atticca ssiajani cajimanahijine inahattabaqquihijine ipajirani. Pina noccodeni siri jahinedeni dsopi icanabaqquijarissa, pina dsidsinidsa jahiridsajarideni piri icanabaqquijarissa inajaro —titiquina najaro. ²⁰ Tettideni naqui: —Moisesicca marinaja icajidsapi nahatoqquri inani. Pajissehecca ima iadsa ahuato tani. Madija ssamoqquri najari pina ejedenissa quinajarideni inahattabaqquihijine nahatoqquri inani —titiquina najaro.

²¹ Tiadenipi Moisesicca marinaja ticajimanaraha ¿nejecotohui najaro marinajassa nehe tinanamanajerajaro? Tiadenipi madija ohuaha mari mari titicanabaqquimana naraha tiadenipi tiadeni mari ticananimanehe nejerani. Tettidenipi madija ohuahadenidsara: —Botimana tiquinejeraji —titiquina naraha tiadeni naqui ¿botiraqquri tiquinaqui? Botiqquri tiquinani. ²² Tettideni onihi naqui: —Amoneje onihi ajamana tiquinejeraji —titiquina naraha tiadeni naqui ¿amoneje onihi ajajera tinaqui? Amoneje onihi ajaja tinani. Siba nahatonidsa naqui jiperaqquri tiquinajaro. Naraha tiadenipi aja siba nahatonidsa dada tahicca titibotimana nahi. ²³ Tettideni onihi naqui: —Moisesicca marinaja bicabote icajini —titiquina naraha Moisesicca marinaja tecahuamananissa tejeradsapi tijinedeni madija ohuaha attidenipa: —Diocca imapi bica tejerani —quiquinanajari. ²⁴ Najaro imapi Dio Atti dsodo nanidsa ajima napojaro: —Tijinedeni jodio quejena-jarajaridenipa Diodsa attideni ocassera tadsa atti atti quinajari —nani nade Dio Atti dsodo nanidsa.

²⁵ Jodio tiquejenadsapi huissinaja ticajimanajaro. Moisesicca marinaja tecahuamananissa tadsapi

Diopa tiadenidsa ima bicani inananitohui. Naraha Moisesicca marinaja tecahuamananissa tejeradsapi ponima huissinaja ticajimanajaro. Diopa tiadenidsa huatidse-jarahitohui. ²⁶ Aja jodio quejena-jarajaridenipa huissinaja cappiramanaraha pina Moisesicca marinajassa inanamanadsapi pohuadenina pina pajissa jodiodenissa quinajari. Ima bicani cajimanahi. ²⁷ Naraha jodiodenipa huissinaja cajimanaraha motapa Moisesicca marinaja ecahuamananissa tejerani. Nidsa dsama jicadsa jodiodenicca huissinaja cappiramanaraha Moisesicca marinajassa inanamanajarodenina aja Moisesicca marinaja dsori inanamanajarodenidsa huati toquinahitohui: —Moisesicca marinaja nahatoqquri tiquinaraha najarossa tinanamana-jerajaro —quinahitohui. Pohuadenijine poccadeni imasiri ahuato tanitohui. ²⁸ Madijapa jodiodenicca etero huedsamanadsa jodio toquejenahi ahuatoqquri najari. Imedenidsa huissinaja cajimanadsa naco jodio toquejenahi nahatoqquri inajaro. Naraha madija jodio tojajaripa pohua huapicca, pohua imeccaha ojari-jerani. ²⁹ Madija pajissa jodio tojadsapa pohua bodi Diodsa ibora tajarina paja. Pohua bodi Dio inahiredsapa pina huissinaja cajijarissa najari. Moisesicca marinajadsa bodi tobica-jararaha Dio Corimejinena bodi tobicajari. Najarojine Diopa pohuadsa jipa tajari. Madija attideni pohuadsa: —Bica tinani —quina-jarahitide naraha Diona: —Bica tinani —najari.

3

¹ —Nadsama jodio iquejenajaropi ¿ima nejecoma narajona iadsa denima bica tajaro? ¿Iapi ponima jodio madija iquejenaqui? —tiquinanitidija. —Huissinajacca

ima icajidsapi ¿Diojine iadsana denima ima bica tanicca icajiqui? —tiquinanitidija. ² Jehe, ima bicanipi ia jodiodenidsana onihi, onihi nehe Diojine icajipojaro. Ima bicani deni tojaniccapi Diojine icca madijadsana Pohua Atti tojapojaro. Najaroa aji Pohua Atti cacahuade iquejenajaropaji. ³ Naraha icca madija motana Dio Atti ecahuamana-jerajaro. Nama quinaraha ¿Diopa ia jodiodenidsa Pohua Attissa inana-jerapadseje? ⁴ Nohuerahi. Diopa maidsera tajari. Madija huapimapa maidsaqquri naraha Diopa maidsa-jarahi. Ima pajissara ihinana najaro. Dio Atti dsodo nanidsapi ajima najaro:

—Huapimadsa ahuato tanitohui. Tiapi pajissehe ponira huati huati tinajaro.

Madija attideni Tiadsa: “Ticca ima pajiranissa tejerani” quinaraha Tiana deni tijanitohui. Tettina pajiranissa tajaro

—nani nade Dio Atti dsodo nanidsa.

⁵ Madija attidenipa ajama quinahitide: —Icca imasirijine Diocca ima pajiranissa tani ahuato tajaro. Ijine ima nema nadsapi ¿nejecotohui Dio ia tonajidso-baqquijari? —quinajari. ⁶ Naraha iapi nema inejerana. Oppina tani. Diopa tabaccora tajarahi. Diopa bica tahi. Nassa Diocca ima pajiranissa tejeradsapi madija huapimacca ima cattemade pajira-jaranaja. ⁷ Madija ohuaha attidenipa: —Maidsehe huati onadsapi najarodsa Diocca pajissehe denima ahuato tani. Ijine Diocca pajissehe ahuato tadsapi madijapa: “Jehe, Diopa bica tahi” quinahitohui. Icca maidsehe nema nadsapi ¿nejecotohui Dio iadsa: “Ticcadeni imasirijine najidsohuedsa tiquejenaji” najari? —quinajari. ⁸ Attideni nama quinajaripa nassa poccadeni marinaja onihi inanamanajaro. Pina: —Imasiri inanadsapi ima bicani ahuato tanitohui —quinajarissa najaro. Madija mota attidenipa: —Pablotenina najaro

ima mari mari ihicanabaqqui najari —quinajari. Naraha maidsamanajari. Nidsa dsama jicadsa madija nama quina-jaridenipa najidsohuedsa toquejenadsapa bica tani, onajaro.

Ia huapimapi imasiri inanajaro

⁹ Naraha ¿jodio iana denima bicaqquri inajaroqui? Nohuerani. ¿Madija ohuahapa poccadeni biquehe ajimaniqui? Nohuerahi. Ia huapimapi imasiri icajiridsani. Tiadenipi ima dsodo onapojarodsa timittamanaponi. Aja jodiodeni, jodio quejena-jarajarideni ia huapima imasiri inananijinepi imasiri iadsa dacorani. ¹⁰ Dio Atti dsodo nanidsapi:

—Madija ima bicani tonanahijine nohuerahi.

Dio qqui inabaquidsapa ojaría imasiri cappirajari nohuerahi.

¹¹ Madija bodi nahato tajari nohuerahi.

Madija Diotohui najari naco nohuerahi.

¹² Huapima Diodsa tohuajimanajari.

Pohuama jajahiridsa najari.

Madija ojaría ima inanabicanijine nohuerahi.

¹³ Madija attideni oppina tadsapi ssiporideni pina tonocobiri tohuabajarossa najaro.

Pohuadeni ebenodsa naco madija icamaidsabaqquimanajari.

Ipodenidsa madija inatabaccoramanajari pina macca comabote madija cca idsadsa comene ahuajarissa quinajari.

¹⁴ Pohuadeni ajaridsa tohuatti bida tajaro qqequequena najaro.

Madija ihitamassomana najari.

¹⁵ Amorideni huassiqquiri najari, tohuemene toccanijine tohui.

Madija ijinedeni ahuamanahijine najoramanaha madi-manajari.

¹⁶ Ajana, pohuadenipa madija ohuahacca madie tonatabaccora-manajari.

Pohuadenijine madija ocasserani ahahuamana najari.

¹⁷ Jonehedsa madimanahijine ssamoqquiri najari.

¹⁸ Dio noppine cappinaquiri nadsapa bica taraha pohuadenipa Diodsa cappineraquiri najari. Bodi-deni huatohuissa tajarahi

—naponi nade Dio Atti dsodo nanidsa.

¹⁹ Nahatoqquiri inani: Diopa pocca dosseniji huapimapi jodiodenidsana da inajaro. Naraha pocca dosseniji nemaneha ecahuamananissa tanijine pajiramana-jarahi. Ima nema nadsapi: —Bicaquiri inani —quinahijine ssamo tani. Nidsa Diopa ajijaro dsamacca madija huapimacca ima cattemade tojadsapa Moisesicca marinajadsa imarideni icattemanitohui. Nadsapi madija ia huapimapi icadidire nanitohui. ²⁰ Madija attidenipa: —Iapi Moisesicca marinaja ecahuanissa tani —quinaraha Dio Attipa: —Jehe, ima ticappiramanani —najarahitohui. Moisesicca marinajajinepi imasiri nahato inajaro. Najaro cacahuade ipajira-jeradsapi ia huapima imasiri icajini ahuato tajaro.

Icassiejeranijinepi Jesocristodsa pajissa inajaro

²¹ Naraha jidapapi Dio iadsa ima onihi ahuato inanajaro: Moisesicca marinaja jirehe icca ima Dio Pohuadsa tobianijine pajirani. Najaro imapi Moisesicca marinaja nemanehedsa nema napojaro. Dio Atti cacomeraquiri najari ohuahadeni naco huati toquinapojaripaja. ²² Madija Jesocristodsa pajissa quinajarideni huapimadsana Dio ajama najari: —Ohuadsa bicaquiri tiquinani —najari. Diodsapa jodiodeni, jodio quejena-jarajaridenicca imapi

najarossa caniquimerajaro. ²³ Madija huapimapi imasiri icajiridseje najaro. Diocca deni tojehedsa iquejenanijine ipajiranissa tejerajaropaji. ²⁴ Aji icca imasiri manaconi najidsohue icajinitohuiraha Jesocristo pohuajinena Dio ia tappa tabaqqijari. Dio iadsa huati huana tadsa manaconi jirehe iadsa: —Tiadenidsapi ima nohuerani. Ohuadsa bicaqquri tiquinani —najari. ²⁵ Diopa Pohua Bedi Jesocristo dsoqquehijine eccoradsapa madija huapimadsa nohue inajaro: Pohuapa imasiridsa huadi tajari. Ahua porimacossanidsa Jeso emene toccajaropi icca imasiri manaconi da inajaro. Itohui Jeso dsoqquejari tahimaridsa pajissa inadsapi Dio iadsa: —Jidapapi ticcadeni imasiridsa ohuati ajimani —najari. Diopa nama najaria iadsa nohue inajaro: Pohuajine pajiranissa tani. Aja tahide Jesocristo dsoqque-jaraccadsama Diopa madijacca imasiri qqui taraha pina qqui torahi najari. ²⁶ Pohuapa nama najaria —Amadsati onajidsobaqquina —najarajari. Mohuaradsa poccadeni imasiri inahanajonajaro. Jidapapi ima pamehe Dio Pohuajine iadsa ahuato tajaro: Jidapapi Dio Pohuajine pajiranissa tajaro. Jesocristodsa pajissa quinajaridenidsa: —Tiadenidsapi ima nohuerani —nadsa naco Pohuajine pajiranissa tajaro.

²⁷ Madija Moisesicca marinaja eahuamananissa tadsapi attidenipa: —Ojine ima pajiranissa tani —quina tahi Diodsa. Naraha attideni ponima tojajaro. ¿Ima neje-coma najarojine attideni ponima totoja najaro? Madijacca ima Diodsa tobicanijinepi madijajine jerani. Jesocristodsa pajissa nadsana pocca ima Diodsa totobica najaro. ²⁸ Najarojine ettipi: Madijacca ima Moisesicca marinaja jirehe Diodsa tobicani pajirani, inajaro. Jesocristo tahimaridsa pajissa inadsapi Dio Atti iadsa: —Jidapapi ticcadeni imasiri manaconi tiadenidsa nohuerani —nahitohui, inajaro.

²⁹ ¿Diopa jodiodeni pohuadeni mottacca Dioco? ¿Dsama onihicca madijadenicca Dio jaraco? Naraha imapi ahuato tani. Diopa dsama huapimacca Dio. ³⁰ Diopa ojarahi. Madija jodiodenicca huissinaja cajimanajari Jesocristodsa: —Pajissa, ohua Tonassiajade —quinadsapa Dio pohuadenidsa: —Jidapapi ticcadeni ima tiadenidsa nohuerani —nahitohui. Jodio quejena-jarajarideni Jesocristodsa pajissa quinadsa naco Diopa pohuadenidsa ima najarossa inananitohui. ³¹ Nadsama Jesocristodsa pajissa inadsapi ¿Moisesicca marinajapi ponima tojanijinequi? Ponima toja-jerani. Jesocristodsa pajissa inadsapi Moisesicca marinaja inapajiranissa tajaro.

4

Abarahao tahimaridsa icahatterajarocca ima

¹ Icca idi Abarahaopa ¿nejeco imadsara Diodsa tobi-cajaritta? ² Ima bicanidsa pohua dsepe ijijarijine Diodsa tobica-jarahi. Aja pohua dsepe ijijarijine Diodsa tobi-cadsapa nassa: —Ohua ojine Diodsa obicajaro —nahitohuiraha imapi nema nejerani. ³ Naraha Dio Atti dsodo nanidsapi ajima najaro: —Abarahaopa Diodsa pajissa nadsana Diopa: “Abarahaopa ohuadsa bica tahi” —najari.

⁴ Ajijaro namicca imapi ajima najaro: Madija tarabaidsa najaripa pohua tarabaidsa najari manaconi cajijari. Naraha tarabaidsa dossedepa pohuadsa: —Aja, tiadsa manaconi jirehe da onana —najarahi. Tarabaidsa dossedepa: —Aja, tiadsa ticca tarabaidsa manaconi da onajaro —najari. ⁵ Naraha Diopa madija imasiri cajjaridsa: —Tiapi ohuadsa bica tinani —nahi caji tahi. Nama najaripa madija pohua dsepe ijijarijine jerani, ima bicani inanajarojine jerani. Najari madijapa Diodsa: —Pajissa Dio madihi —nadsana Dio Attia: —Ajajari

madijapa ohuadsa bica tahi —najari. Diodsa pajissa najarijine pocca ima Diodsa pajiranissa tajaro. ⁶ Najaro imapi maittaccadsama tamine Dabi naco huati tapojari: —Madija pohua dsepe ijjaripa Diodsa pohua tonanabica-jararaha Diodsa pajissa nadsana Dio pohuadsa: “Bica tinani” najari. Nadsapa najari madijapa huatidseri dsanapojari —nahi nade Dabi. ⁷ Dabi pohua huati tapojaricca imapi Dio Atti dsodo nanidsa ajima najaro:

—Madijacca imasiri Dio sse inaridsadsapi huatidsemaneri najari.

Poccadeni tabaccorehedsa: “Epeje, ohuati ajimani” nadsa naco huatidsemaneri najari.

⁸ Imasiri inanamanapojarocca ima Dio inajicadsapi huatidsemaneri najari —nahi nade Dio Atti Dabijine dsodo nanidsa.

⁹ Aji ¿najaro huatidsehepi jodiodenicca huissinaja cajimanajaridenidsara ojarinijinequi? ¿Madija jodiodenicca huissinaja cappiramanajaridenidsa naquij tojarid-sanijinequi? Naraha ettipi: Abarahao Diodsa pajissa nadsapa: —Abarahaopa ohuadsa bica tahi —najari, inajaro. ¹⁰ Naraha ¿nejecoma nadsa Diopa: —Abarahaopa bica tahi —najaritta? ¿Abarahao huissinaja cajidsattaco? ¿Huissinaja caji-jaradsattaco? Naraha huissinaja caji-jaraccadsama Diopa: —Abarahaopa ohuadsa bica tahi —napojari. ¹¹ Dsotodena Abarahaodsa Dio huati tajari: —Huissinaja ticajiji —najari. Najaro huissinaja cajidsapa Abarahao Diodsa jehe napohuicca ima ahuato tajaro. Nadsapa madija ohuahadeni naco huissinaja cappiramanaraha Diodsa jehe naridsamanadsapa Abarahaopa pina poccadeni abissa najaripaja. Najaridenidsa naco Dio Atti: —Ohuadsa bicaquiri tiquinani —najari. ¹² Madija huissinaja cajimanajarideni naco Diodsa pajissa quinadsa pina Abarahao huissinaja cappiraccadsa Diodsa pajissa

najarissa quinadsapa Abarahaopa pina poccadeni abissa najari.

*Diopa Pohuadsa pajissa quinajaridenidsa pina Abara-
haodsa huati tapojarissa inananitohui*

¹³ Maittaccadsama Diopa Abarahaodsa huati tapo-
jari: —Tiadsa, tipotemanidsa ima bicani onananitohui.
Tiadenidsa dsama nemaneha da onanitohui —napojari.
Naraha pocca huatinajapi Abarahao Diocca dosseniji ec-
ahuanissa tajarojine jerani. Abarahaopa Diodsa pa-
jissa najarijinenana pohuadsa tojajaro. Pocca jehenijiji-
nena Dio Attia: —Abarahaopa bica tahi —nanaja na-
jari. ¹⁴ Aja Dio huati tapojaricca ima bicanipi Pohuadsa
pajissa quinajaridenidsa tojajaro. Aja madija Diocca
dossenijidsa iboraquiri najaridenidsana pocca huatinaja
tojadsapi nassa Diodsa pajissa quinajaridenicca jehenijipi
ponima tojanitohuiraha. Diocca huatinaja naqui pon-
ima tojanitohuiraha. ¹⁵ Madijapa Diocca dosseniji ec-
ahumananissa tanijine pajiramana-jarahi. Dsori inana-
manadsapi najidsohuedsa bacco toquinahitohui. Naraha
najaro dosseniji nohueradsapi madija dsori inanamanani-
jine pohuadenidsa nohuerani.

¹⁶ Naraha Dio huati tapojaricca ima bicani Abarahao
potemahidsa tojajaropi Diodsa pajissa quinadsana po-
huadenidsa tojajaro. Moisesicca marinaja cajimanajari-
denipa pina Abarahao Diodsa pajissa najarissa quinad-
sapa Diocca huatinaja pohuadenidsa tojajaro. Ia naqui
pina Abarahao Diodsa pajissa najarissa inadsapi Diocca
huatinaja iadsa tojajaro. Nema nadsapi Abarahaopa ia
pajissa inajaro huapimacca abi tojajari, inajaro. ¹⁷ Dio
Atti dsodo nanidsapi ima ajima najaro: —Ojine dsama
huapimacca abi tijajaro —najari Dio Abarahaodsa. Diopa

madija huatiahi Pohuajine camittemanihi pajirajari. Aji-jaro dsamapi nohueraporaha Dio Pohuana inahatojaro. Aja dsamacca cajiridsajari naco nohueraraha Dio Pohuana inahatoridsajari. Najaridsana Abarahao pajissa najari.

¹⁸ Abarahao jadahi tocaja, bedimeni jadani tocaja nadsana Dio pahuadsa huati tajari: —Tipotemani ticajinitohui —najari. Ejedeni cajimanahijine tossamomanaraha Abarahaopa Diodsa pajissa nadsa: —Ohua opotemanipa huapi taha ocajinitohui —najari. Nadsapa pina Dio huati tajarissa najaro tohuini madijari. Nama nadsapa dsama huapimacca abi tojajaripaja. Pina pahuadsa Dio huati tapojarissa najaro: —Tipotemanipa tohuapihitohui, pina abadsico bedi huapi tajarissa nahitohui —najari. ¹⁹ Abarahaocca huajano 100 bacco tabote naraha Diodsa pajissa najaripa nebo najarajari. Pohua bodipa: —Odsosquenicca huajira tani. Sara dsosquenicca naqui huajira tani —najari. —Sara ejedeni cajinijinepi tossamoni —najari. Naraha Diocca huatinajadsapa pajissa dsanapojari. ²⁰ Diocca huatinajadsa Abarahaopa: —¿Pajissaqui? Pajissa jeranitide —najarajari. —Diojinepi pajiranissa tanitohui —nadsana pocca jeheniji deni tojadsanapojaro. Diodsa huatidseri dsanapojari. ²¹ Abarahao pohua bodidsa nahato tajaripa: —Dio pocca huatinaja pajiranissa tajaropi dacorehe cajijari —najari. ²² Najarojinea Dio: —Abarahaopa ohuadsa bica tahi —najaripaja.

²³ Abarahaopa Diodsa pajissa nadsa Diopa pahuadsa: —Bica tinani —najari dsodo napojaropi Abarahao pahuadsa ojari-jerani. ²⁴ Najaro imapi iadsa naqui dsodo najaro. Ia naqui ia Medsede Jeso Nahatonide Diodsa pajissa inadsapi Pohuapa iadsa: —Bicaquiri tiquinani —najari. ²⁵ Diopa Pohua Bedi da inadsa dsosquejari, icca imasiri manaconi. Inahatonijaripa iadsa: —Imasiri ticappiramanani —nahijine.

5

Jesojine Dio tedseje icajonerajaro

¹ Ia Medsede Jesocristo itohui dsoqqejaricca imadsa pajissa inadsapi Diopa: —Tiadenidsa ima nohuerani —najari. Najaroa aji Dio tedseje icajonerajaropaji. ² Cristodsa pajissa inadsapi pohuajine Dio iadsa catidse tahi. Najaroa aji Dio Pohuadsa disseraqquri inajaropaji. Nidsa Dio dsamarihuajipi pocca deni tojehe iadsa tojanitohui inadsa ehetidse najaro. ³ Naraha itedsejemacca ima bicanidsaha etidseni ojari-jerani. Aji ocasserani ejarodsa naqui etid-senijine. Ajijaro ima nahatoto inani: Ocasserani ejaropi denima idacocorani nanijine, ocasserehe tonahanade iat-tanijine. ⁴ Idacocorani nadsapi Diopa: —Tijinedeni bica tani —najari. Nadsapi ijine Diodsa bica tani nahatoto inadsapi itedsejemacca ima bicani iadsa tojanijine naqui ibodidsa ahuato tajaropaji. ⁵ Aji itedsejemacca ima bicani tohuini imadijaropi maidsehe toja-jeranitohui. Dio Pohua Corime iadsa da inajaripa ibodidsa pocca tohuati huanehe inananissa tajaro.

⁶ Iapi ijine icassiejeranijine ipajira-jeradsapi tohuati nahanaqquri inapode. Naraha Dio ima inanajorapojarocca huada bacco tadsa Cristo dsoqqejaripa madija imasiri sseqquiri najaridenicca imasiri manaconi dsoqqejari. ⁷ Madijapa pohua tessedsa ima oppina tehe tojadsa pohuadsa: —Dsoqquena —quinadsa pohua tesse tossiajahijine: —Ohuara odsoqquena —nahijinepa cappina tahi. Pohua ccaccoraja, pohua ccaccora-jaraja nahitide. Naraha pohua tesse madieri bica taraha pohuadsa: —Dsoqquena —quinadsapa najari tossiajahijine madija ojari ojari naha pohua ccaccora tahi. ⁸ Naraha Dio iadsa huati cahanari canahi nahatoqquri inanijinepi imasiri sseqquiri inaraha Cristopa itohui pohua ccaccorajari. ⁹ Icca imasiri manaconi Cristo emene toccajarojinena Dio

iadsa: —Jidapapi ticcadeni ima ohuadsa tobiani —najari. Nidsa pocca najidsohuecca huada bacco tadsapi ima bicani denima icajinitohui. Pocca najidsohue iadsa ssonari-jeranitohui. ¹⁰ Tahide imasiri icajie imadipodsapi Dio tedseje icahadirehe imadipoccade. Nema inadsa imadiporaha Dio Pohua Bedi icca imasiri manaconi dsoqquedsana Dio Pohua tedseje icajonerajaropaji. Jidapapa Cristo nahatonia camitta taha madidsapa ia tonassia-jabaquihitohui, inajaro. ¹¹ Najaro ima bicania iadsa ojari-jerani. Diodsa naqui huatidsehe imeni icajini. Ia Medsede Jesocristojinena Dio tedseje icajonerajaro.

Adana Cristo tedseje tahimarideni

¹² Dsama nahatoponipa Adanaha madipojari. Adana pohuana ibohuedsa imasiri inanapojaro. Adanapa ojari naha madiporaha pohuajine madija huapimadsa imasiri dsapa teje najonaponi najaropaji. Najaria aja madija huapima imasirima madi-jonamanadsapa jadahi tocajamanadsa huatiamanaja najonapohui najaripaja. ¹³ Imasiripi Moisesicca marinaja nohueraccadsama tahide madija imasiri inanaridsamanapojaro. Aji Moisesicca marinaja nohueraccadsapi madijadsa: —Imasiri ticajini —quinahijine nohueraccani. ¹⁴ Naraha nema nehe Adana madipodsama imasiri inanamanajarodenipa dsoqqeche inahanajonamanajaroa aji Moisesicca marinajadsa bacco toquinajaripaja. Adana natti madimanajaridenijinepi pina Adanajine imasiri tojajarossa nejeraraha nama naha imasiri cajimanajari.

Adanapa madija ohuaha dsotode ccajonahijine tahimari ahuato inanapojari. Najaripa Diocca daniji Jesocristo. ¹⁵ Naraha Adanacca danijipi pina Diocca danijissa nejerani. Adanapa ojariraha pocca imasirijine aji

huapima eheta najaropaji. Diopa madijadsa huati cahanari canadsa manaconi jirehe icca ima tobicanijine pocca ejedeni Jesocristo da inajari. Puhuapa ojari-raha pohuajine camittehe icajijaro. ¹⁶ Diocca danijipi pina madija ojariacca imasirissa nejerani. Adanacca imasiri ojari napodsapi Dio madija huapimadsa: —Imasiri ticajiridsamanani. Nanajidso tiquejenanitohui —najari. Madijapa imasiri sseqquiri naraha Diocca daniji-jinena huapimacca imasiri jicaridsajaro. Nadsapa Dio madijadsa: —Tiadenidsa ima nohuerani —najari. ¹⁷ Madija ojariacca imasirijinea eheta najaropaji. Dsoqquehepi ajijaro dsama nemanehedsa dacorajaro. Huapimadsa deni tojajaro, pina tamine deni tojajarissa najaro. Najaro imassa naraha ima denima bica tajaropi madija ojaría Jesocristona pocca madijadsa camittehe dsati da inajaro. Nadsapa pohuadenina dsoqquehedsa deni toquejenajari. Nama quinahijinepa Dio pohuadenitohui huati cahanari canadsa poccadeni ima manaconi jirehe inapajiranissa tajaro.

¹⁸ Adanacca imasirijine madija huapimadsa najidsohue tojajaro. Najarossa najaro Jesocristocca ima bicaniijine madija najidsohuedsa dsori tocanirejari. ¹⁹ Madija ojaría Diodsa ibo tadsapa madija huapimadsa imasiri tojaridsajaro. Naraha madija ojaría Diodsa ibora tadsapa pohuadsa pajissa quinajaridenicca imasiri Djoline jicaridsajaro. Pohuadenidsa Dio Attia: —Jidapapi ohuadsa bicacquiri tiquinani —najari.

²⁰ Dio pocca dosseniji Moisesidsa da inajaropi madijacca imasiri pohuadenidsa denima ahuato tanijine. Nadsapi imasiri denima inanamanaraha Diocca tohuati huanehena deni tojajaro. Diopa madijadsa huati cahanari cadsanapojari. ²¹ Imasiri dacorajarojinea aji eheta najaropaji. Naraha Diocca tohuati huanehe denima daco-

radsapi Dio pohua icadossedsa ia Medsede Jesocristojine icca imasiri jicajaro. Nadsapi icca ima Diodsa tobicajaro. Ia Medsede Jesocristojine camittehe jiquejeranicca icajid-sanaponitohui, inajaro.

6

Cristodsa ijariquijarocca ima

¹ Aji ima imittajaropi madija imasiri denima inana-manaraha Diocca tohuati huanehena madijadsa denima dacorajaro. Nadsama ¿iapi nejecoma inanijine? Diocca tohuati huanehetohui inadsapi ¿imasiri inananiijinequi? ² ¡Poni! ¡Imasiri inana-jerana! Pina aja madija dsoqquedsa imasiri ssamo tajarissa inajaro. Nema inadsapi ¿imasiri inana-dsanaponijinequi? Nohuerani. ³ ¿Totopacca imapi nahatoqquri tiquinejerajaroqui? Totopa icajidsapi Jesocristo pohuadsa ijariquijaro. Pina pohua tedseje ecotajarossa najaro. ⁴ Passodsa ia topa idsamanadsapi pina Cristo tedseje ia ppa idsamanajarossa najaro. Aja Cristo ppa idsamanaraha Abi Dio pocca deni tojehe bicabotema Cristo inahatonijari. Ia naqui Cristo pohua tedseje ecotaraha pohua tedseje inahatonijarossa najaro. Najaroa aji madie dsati icajjaropaji.

⁵ Cristodsa ijariquijaropi pina pohua huatijarissa inajaro. Cristo nahatonidsa naco pina pohua tedseje inahatonijarossa inajaro. ⁶ Ajijaro ima nahatoqquri inajaro: Icca madie jadani naqui pina Cristo ahua porimacossanidsa huatijarissa najaro. Najaro jicadsapi ia tohuini inanicca tabaccorehe naqui jicajaro. Iadsa ajimani tojadsapi pina ia dossedessa napoma-jerani. Nema nadsapi imasiridsa imadidsanapo-jeranitohui. ⁷ Pina madija dsoqquedsa imasiri denima inananiijine ssamo tajarissa

inajaro. ⁸ Cristo pohua tedseje ecotajaropi pajissa pohua tedseje imadinitohui, inajaro. ⁹ Iapi nahatoqquiri inani: Cristo huatiaraha nahatonijaripa huatiapomajarahitohui, inajaro. Ehetia najarocca imapi dacoraraha Cristodsapi dacora-gerani. ¹⁰ Cristopa dsoqquehi ojari naraha najarodsa imasiricca dacorehe pohuadsa jicanissa tani. Nadsapa camittemanidsa Diocca deni tojehe ahuato tanijine madijari. ¹¹ Nadsama iapi ibodidsa ajima inana: Pina ecotajarossa nadsana imasiricca dacorehe iadsa jicani. Jidapapi Jesocristodsa ijariquidsapi Dio Pohua tohui nahiccara inananijinena imadijaro.

¹² Aji imasiripi tessiredeni dsoqqeque taniccadsa dossede dacorajaro. Tabaccorehe tinanamananijine tiadeni dosse dosse najarossa najaro. Najarodsa poni tiquinaji, timedenidsa tohuini tiquinanicca tinanamanageranijine. ¹³ Tessiredeni ima tabaccora taniccadsa teccoramana tejeraji. Tessiredeni Diodsara teccoramaji. Tiadenipi pina madija dsoqqueraha nahatonidsa madijarissa tiquinajaro. Nadsapi tessiredeni ima bicandisana teccoramaji. ¹⁴ Nema tiquinadsapi imasiri tiadenidsa dacora-geranitohui. Jidapapi Moisesicca marinajadsa timadimana-gerani. Diocca tohuati huanehed-sana timadimanajaro.

Madijacca dodosse tabaqqi toquejenjaridenicca ima tadsajani mari icanabaqqijari

¹⁵ Jidapanapi Moisesicca marinajadsa imadi-gerani. Diocca tohuati huanehedsana imadijaro. Nema inaraha ¿imasiri inanani bica taqui? Bica tejerani. ¿Poni! Nema inejerana. ¹⁶ Tiadenipi nahatoqquiri tiquinajaro. Madijacca dodosse tabaqqi tiquejenadsapi pina tiadeni dossede attissa tinanamananijine pohuadsa tiadeni teccoramajaro. Tiadeni dossede attidsa

iboraquiri tiquinadsapi pocca dodosse tiquejenajaro. Najaro imassa najaroa tabaccorehe tinanamananijine iboraquiri tiquinadsapi pina imasiricca dodosse tiquejenajarossa najaro. Nema tiquinadsapi paji tijicarinitohui. Naraha Diodsara iboraquiri tiquinadsapi Pohuadsa ima bicani tinanamana-dsanaponitohui. ¹⁷ Ima bicani ticattejidsamanadsapi Diodsa ohuatidseda: — Jehe Abi Dio, tijine bica tani —onajaro. Tahidepi pina imasiricca dodosse tabaquissa tiquinaporaha jidapapi Jesocristo tahimari tiadeni mari tocanabaquimanadsana ticcadeni huatidsehema iboraquiri tiquinajaro. ¹⁸ Nadsapi imasiricca dodosse tabaquissa tiquinejeranijine Dio tiadeni todinibaquidsapa ima bicanidsara tidsepedeni ijimanajaro. ¹⁹ Aji huati huati onajaropi timittamananijine najo tani onadsa ajijaro namicca ima tadsajani tiadeni mari ocanabaquijaro. Tahidepi tessiredeni huananehedsa teccoramanapojaro. Ima onihi tabaccora tajarodsa naqui tessiredeni teccoramanadsapi pina imasiricca dodosse tabaquissa tiquinapode. Naraha jidapapi Jesocristojine ticcadeni ima cacajiquimerani. Tessiredeni ima bicanidsara teccoramanaji. Nani bicaquiri tiquinadsa Diotohuira timadimana-dsanapodsapi pocca dossenijidsara iboraquiri tiquinanijine.

²⁰ Pina imasiricca dodosse tabaquissa tiquinapodsapi ima bicanidsa tidsepedeni ijimana-jeraccade. ²¹ Naraha imasiri tinanamanadsapi ¿nejecora bica tanicca titicajimana najarotte? Nohuerani. Jidapapi aji imasiri tinanamanapojarodsapi ticappinamanani. Najaro imasiridsapi dsoqqehe jiquejericca najidsohuedsa timadimana-dsanaponitohuiraha. ²² Jidapapi pina imasiricca dodosse tabaquissa tiquinejerani. Diodsara tidsepedeni ijimanani. Najaro imana deni tojanicca

ticajimanajaro. Jehe, Diodsara tidsepedeni ijimana-dsanapodsapi bicaquiri tiquinadsa Pohuatohuira timadimana-dsanaponijine. Nani camittehe jiquejeranicca naqui ticajimana-dsanaponijine. ²³ Icca imasiri manaconipi dsoqqehe jiquejeranicca. Naraha Diocca danijipi camittehe jiquejeranicca. Ia Medsede Jesocristodsa iquejenadsapi Diocca daniji icajini.

7

Cajicajicca imadsa mari icanabaquijari

¹ Ohuemecotedeni, tiadenipi Moisesicca marinaja nahatoquiri tiquinani: Madija madiccadsapa Moisesicca marinaja pohuadsa dacoraccani. ² Najaro ima ahutato tanijinepi cajicajicca imadsa tiadeni mari ocanabaquina, onajaro. Moisesicca marinajadsapi ajima najaro: Amoneje maqquideje cajidsapi ponicca maqqui madiccadsapa pohuadsara madiccani bica tani. Najaro cajicajicca marinaja ponidsa dacoraccani. Naraha ponicca maqqui dsoqquedsapa cajicajicca marinaja ponidsa nohuerani, jicani. ³ Aja ponicca maqqui madiccadsapa maqquideje ohuaha inajadsapi ponicca maqquids imasiri inanajaro. Cajicajicca marinaja dsori inanajaro. Naraha ponicca maqqui dsoqquedsana cajicajicca marinaja ponidsa jicani. Maqquideje ohuaha cajinijine oppinera tani.

⁴ Ohuemecotedeni, tiadeni naqui pina Cristo tedseje ecotajarossa nadsapi Moisesicca marinaja iadsa dosse dosse napojaropi jicani. Jidapapi ia dossede marinaja onihi icajinijine bica tani. Nadsapi aja Cristo dsoqqueraha nahatonijaricca dodosse iquejenani. Nema nadsapi Diodsa idsepe ijiridsanijine bica tani. ⁵ Icca ima tabaccora tajaroma imadipodsa Moisesicca marinaja ia mari tocanabaquidsa imittaraha najarojine imecca imasiri denima

tohuatodsapi denima tohui ibodi huahuato naccade. Najaro imasirima imadidsapi dsoqqehe jiquejeranicca najdsohuedsa imadi-dsanaponijneraha. ⁶ Naraha jidapapi Moisesicca marinaja iadsa dacora-gerani. Ia dosse dosse naporaha jicani. Moisesicca marinajadsapi ecotajaro. Jidapapi Moisesicca marinajabotedsa Diodsa idsepe iji-gerani. Dio Corimecca daniji icca madie dsatidsana Diodsa idsepe ijidsanapojaro.

Imasiripi iadsa madini

⁷ Jari, aji Moisesicca marinaja imittadsa ibodicca imasiri tohuatojaro onajaropi ¿Moisesicca marinajapi imasiri onajaroqui? ¡Nema onejerani! Pocca marinajadsa imasiri onananicca ima ohuattajaro. Pocca marinaja omitta-geradsapi nassa imasiricca ima nahato onejeraneje. Imapi ajima najaro: Madija ohuaha dsepetaji tohuini onacomadsapi obodi: —Imasiri gerani —onaraha Diocca dosseniji Moisesidsa da inajaro ojariepi: —Madija ohuaha dsepetaji tohuini tinacomamana tejeraji —nani omittadsapi nahato onajaro. ⁸ Moisesicca marinaja nohueradsapi imasiricca dacorehe ahuatoma-geranitohuiraha. Naraha madija ohuaha dsepetaji tohuini tinacomamana tejeraji omittadsapi occa imasiri ahuatomajaro. Obodidsa tabaccorehe tohuini onajarojine onoccodsa qqui onajaro tohuini ohonacoma najaro.

⁹ Tahide Moisesicca marinaja omitta-geradsapi pina bica onadsa omadjarossa najaro. Naraha dsotode madija ohuaha dsepetaji tohuini tinacomamana tejeraji omittadsapi imasiri onanani ohuadsa ahuato tajaro. Dsoqqehe jiquejeranicca naqui ohuadsa ahuato tajaro. ¹⁰ Moisesicca marinajajinepi camittehe jiquejeranicca ohuadsa tojani-jineraha najaro dsori onanadsapi dsoqqehe jiquejeranicca ohuadsa tojajaro. ¹¹ Imasiripi mamaidsadessa na-

jaro. Moisesicca marinajadsa ohua camajadsajaro. Omadidsanaponijinecca ima tohuini onaraha imasiripi dsoqquehe jiquejeraniccahuajina ohua tonanajaro.

¹² Moisesicca marinajapi bica tani, imasiri cappirani. Diocca dosseniji huapima Pohujine pajiranissa tajaro, bica tani. ¹³ Naraha aji Moisesicca marinaja bicaniijine ¿dsoqquehe jiquejeranihuaji occanijinequi? Nohuerani. Imapi nema nejerani. Diocca dosseniji ojarie dsori onanadsa imasiri onanajarojinena dsoqquehe jiquejeranihuaji occanijine. Moisesicca marinaja bicaniijinepi imasiricca ima ohuadsa ahuato tajaro: Imasiripi oppina tani, tabaccora tajaro.

¹⁴ Moisesicca marinajapi Diocca daniji bicani nahatoqquri inajaro. Naraha ohuapi ohueme ocajie omadidsapi imasiri ohuadsa dacorajaro. Pina ohua dossedessa najaro. Poni tohuini naniccara onanijine ohua cacadosse najaro. ¹⁵ Najaro obodi huatodsapi: —¿Nejecotohui obodicca ima jidsa tajaro? —onajaro. Ohua jipa onanicca bica taniccara onana-gerajaro. Tohuajari nadsa taniccara onanajaro. ¹⁶ Ohua jipera onanicca onanadsapi ima ohuadsa ahuato tani: Moisesicca marinajapi bica tani. ¹⁷ Naraha aji ohua jipera onanicca onanajaropi ohua motta ojine jerani. Imasiri obodidsa madidsajarojine ohua ocadossenijaro. ¹⁸ Ohuapi ohuadsa ima bicani nohuerajaro nahato onani. Ohueme ocajie omadije najaro imasiri sse onani. Ima bicani onanijine tohuini onaraha nema onana-gerani. ¹⁹ —Ima bicani onanana —onaraha ima bicani onanajerani. Ohuapi ima tabaccora tajaro tohuini onejeraraha tabaccorehe ohonana najaro. ²⁰ Nadsapi obodi huatojaro: Ohua jipera onanicca onanajaropi ohua motta ojine jerani. Imasiri obodidsa madidsajarojine ohua ocadossenidsa nema onanajaro.

²¹ Obodi huatomadsapi ajijaro ima ocajijaro ohuadsa

ahuato tani: —Ima bicani onanana —onaraha ima tabaccora taniccara onanajaro. ²² Obodipi Diocca dosseniji Moisesidsa da inajaro tohuini onani. ²³ Naraha ohuemepi ima onihi cajijaro. Ohuemedsa imasiri dacorajarojine obodicca ima bicani tadsajani pina cahadirejarossa najaro. Imasiri deni tojadsapi pina poni dsapanidsa ojararossa najaro. Ohua jore naquijaro. ²⁴ ¡Jaho, tohuati nahana onaponi! Ohuemepi dsoqqehe jiquejeranihuaji ohua tohuaqqejeranijine ¿nejecojarina ohua dicca nahijine pajirahi? ²⁵ Ia Medsede Jesocristona ohua dicca nadsapa Diodsa ohuatidsedsa: —Jehe, tijine bica tani —onajaro. Nadsama occa imapi ajima nani: Obodipi Diocca dossenijidsa ibora tajaro. Naraha ohuemenas imasiri onananijine ibora tajaro.

8

ICCA MADIE DSATIFI DIO CORIME IA MARI TOCANABAQUIJARI

¹ Nadsama Jesocristodsa iquejenajaropi Dio icca imasiri manaconi iadsa inassonari-jeranitohui. ² Jesocristodsa iquejenajaropi Dio Corimena ia dosse dosse najari. Camittehe jiquejeranicca iadsa inanadsapi imasiridsa imadijerajaro. Dsoqqehe jiquejeranicca ima naqui iadsa nohuerani. ³ Najaro ima bicanipi Diojinena iadsa tojajaro. Moisesicca marinajajine jerani. Moisesicca marinajapi ecahuanissa tanijine ipajira-jerani. Madija iapi ibodidsa tabaccorehe tohuini inehe imadijaro. Najarodsa Diopa: —Tabaccora tani. Najarojine najidsohue ticajimanantohui —nanaja najari. Naraha najaro imasiri tomossinijinepi Dio Pohua Bedi dosse inaronajari. Pina madija essire icajjarossa naha cajidsapa pohua assiredsana icca imasiri manaconi Djoline ssonarijaro. ⁴ Dio nama nadsapa pocca dosseniji bicabote inapajiranissa tehe imadinijine. Nema inanijinepi ibodicca tabaccorehe tohuini inejeradsa

imadijaro. Dio Corimecca dossenijidsana ibora inadsa imadijaro.

⁵ Naraha Jesocristodsa toquejena-jarajaridenipa bodidenidsa tabaccorehe tohuini quinaha madimanajari. Najaria aja najaro tabaccorehe tohuira bodideni huahuatoma-mana najaripaja. Naraha aja Jesocristodsa toquejenajaridenipa Dio Corime pohuadenidsa madijaria aja Dio Pohua jipa tahicca ima tohuira bodideni huahuatoma-mana najaripaja. ⁶ Naraha aja pohuadeni bodicca tabaccorehe tohui bodideni huahuatoma-mana najaripa paja dsoquemanarihicca najidsohue pohuadenidsa tojanitohui. Naraha Dio Corimejine Dio Pohua jipa tahicca tohui bodideni huahuatoma-mana najaripa madimana-dsanapohuijinecca ima cajimanajari. Jonehema madimanahissa tajari. ⁷ Aja pohuadeni bodicca tabaccorehe tohui bodideni huahuatoma-mana najaripa Dio ihicahadimana najari. Pocca marinajadsa iboraqquri nahijinepa ssamoqquri nahi. ⁸ Madija pohuadeni bodicca tabaccoreheda iboraqquri najaridenipa Dio inahatidsemanaha najarahi.

⁹ Naraha tiadenipi tibodidenicca tabaccorehe tohuini tiquinehe timadimana-jerani. Pajissa Dio Corime tiadenidsa madidsapa Pohujine Dio jipa tahicca imatohuira timadimanani. Naraha madija Cristo Corime cappirajaripa Cristocca jarahi. ¹⁰ Tessiredenipi imasirijine tidsoquemanaraha ticorimedenina madimana-dsanaponitohui. Cristo tibodidenidsa madijarijine Diopa: —Tiadenipi ohuadsa bicaqquri tiquinani — najari. ¹¹ Diopa Jeso inahatonijaria Pohua Corime tibodidenidsa madijari. Nadsapa Pohua Corime tiadenidsa madijarijine Jesocristo Nahatonide Pahuana tessiredenidsa camittehe jiquejeranicca da inaridsanitohui.

¹² Ohuemecotedeni, ia dossede icajini. Najaripa Dio

Corime. Nema nadsapi ibodicca tabaccoreheda ibora inejerana. Najaropi icca ima jerani. ¹³ Tabaccorehe tohuini tiquinaniccadsa iboraqqiri tiquinadsapi dsoqqehe jiquejeranihuaji timadimana-dsanaponitohui. Naraha Dio Corimecca dossenijidsana iboraqqiri tiquinadsapi tabaccorehe tohuini tiquinajarocca tinajicamanajaro. Nadsapi camittehe jiquejeranihuaji timadimana-dsanaponitohui.

¹⁴ Huapima Dio Corimecca dossenijidsa iboraqqiri tiquinadsapi Diocca ejedeni tiquejenani. ¹⁵ Dio Pohua Corime tiadenidsa inanajaripa bica tajari. Pohuajine Diocca huadie noppineni ticappinamananijine jarahi. Pina madijacca dodosse toquejenajarideni pohuadeni dossedecca huadie noppineni cappinamanajarissa tiquinanijine jerani. Dio Corimejinea Diocca ejedeni iquejenajaropaji. Pohuajine naqui Diodsa: —Abi —inajaro. ¹⁶ Dio Corimejinena ibodidsa ima ahuato tajararo: Pajissa Diocca ejedeni iquejenajaro. ¹⁷ Nadsama Diocca ejedeni iquejenadsapi pocca daniji bicani iadsa tojanitohui. Huapima Djojine pocca ejedeni Jesocristodsa toजारopı iadsa naqui tojanitohui. Pajissa Cristo pohua tedseje ocasserani edsapi nidsa dsotode pocca cacahueheda bacco inadsa pohua tedseje pocca deni tojehedsa ia naqui imadinitohui.

Diocca deni tojehe Pohua dsibehinema qqui inanitohui

¹⁸ Ohua obodi huatodsapi ajjararo namidsa imadidsa ocasserani eraha najaropi jicaca tani. Nidsa memehujina Diocca deni tojehe Pohua dsibehinema qqui inahitohui. Pocca deni tojehe iadsa tojanitohui. Najarona iadsa denima bica tajararo. ¹⁹ Dio inahatoridsajari huapimadsa Diocca ejedeni iquejenajaro ahuatoqqiri inanijine ia qquidepa najoramanahi. Pocca nahatonaja huapimapa

najaro qqide tohui inacomamanajari. ²⁰ Aja Dio inahatoridsajari huapimapa poccadeni biquehe onihi onihi cajiridsamanaporaha poccadeni ima totabaccorajaropi pohuadenijine jerani. Aja Dio Pohua inahatoridsajari huapimapa Pohuana inajidsoridsajari. Pohuadenidsa najidsohue ssonari, comehe ssonari, dsoqqeuehe ssonari najaropaji. Naraha poccadeni ima tobicanijine tohuini madimanajari. ²¹ Nidsa Dio pocca ejedenidenidsa pocca deni tojehe inaridsadsapi dsoqqeuecca dacorehepi jicanitohui. Najaro deni tojehe Pohua inahatoridsajaridenidsa naqui inaridsadsapi dsoqqeuehe tappa inabaqquihitohui. ²² Nahatoqquri inani: Dio inahatoridsajari huapimapa pina amoneje ejedeni comene johua johua najarossa quinaha ocasserani ahuajonamanajaria jidapana ajijaropaji. ²³ Iapi Dio Corime icajiraha ajijaro namidsa nahatoridsajarideni tedseje ocasserani eccani. Aji Dio Pohua Corime iadsa da inajaropi nidsa dsotode ima bicani icajinijine nahatoqquri inani. Naraha najaro ima bicanitohui imadidsapi icca ojiema imadiccajaro. Nidsa dsotode najaro ima bicani iadsa tojadsapi Dio Pohuajine pocca ejedeni iquejenajaropi huapimadsa ahuato tani-tohui. Pohuajine naco essire cacajiquimeradsapi dsati tojanitohui. ²⁴ Jesocristodsa pajissa inajaropi tossiejehe icajini. Nadsapi itedsejemacca ima bicanitohui imadijaro. Najaro qqui inadsapi denima tohuini inejeranitohui. ²⁵ Naraha aji tohuini imadijaro qqui inejeraccadsapi mohuaradsa najarotohui imadijaro.

²⁶ Jehe, ima bicani tohuini imadidsapi ia acco camajaro. Najarossa najaro ocasserani edsa icca jeheniji tojaparidsapi Dio Corime ia acco cama tahi. Diodsa huatide inasamoqquidsa naqui Dio Corime pohua ssa tocanacossadsa Diodsa atti jiraha icca ima huati toqquima tahi. ²⁷ Diopa ibodi qqui taridsahi. Pohua Corimecca huatinaja nahato

tajari. Pohua Corimepa Dio Pohua jipa tahicca nahato tadsa pocca ejedeni iquejenajaro icca ima Pohuadsa huati tahissa tataja najari.

Diocca deni tojehe icajinitohui

²⁸ Icca madiedsapi ima onihi onihi naridsajaro. Ima ocassera tanicca naqui iadsa bacco bacco najaro. Naraha Dio Pohuajine ima huapima iadsa tojajarocca tassaquid-sapi iadsa ima bicani tojanijine nahatoqquri inajaro. Aja Pohuadsa huatideni huanacquiri najarideni huapimadsa nema inananitohui. Najaridenidsa huahua najari, pina Pohua bodi: —Ajima onanana —napojarissa inanjaro. ²⁹ Diopa najaridenidsa tahide nahato tapojari: —Pohuadenipa pina occa ejedenissa onanabaquihitohui —napojari. Najaria aja Dio Pohua Bedipa imecotedeni huapimacca ato tojajaripaja. ³⁰ Dio Attipa: —Occa ejedenissa onanabaquihitohui —napojaria aja pohuadenidsa huahua najaripaja. Dio huahua inabaquijari Jesocristodsa pajissa quinadsapa Dio Attipa: —Poccadeni imasiripi jicaridsani —najaripaja. Poccadeni imasiri jicaridsajaridenidsa pocca deni tojehe inaridsajaro.

³¹ Ajijaro ima imittadsapi: —Jehe, ima bicani icajini —inajaro. Dio iadsa jipa tadsapa aja madija iadsa jiperacquiri najaridenicca imapi ponima tojajaro. ³² Diopa pocca ejedeni Jeso iadsa eccocco-jarajari. Icassiejeranijine eccoradsa dsoqquejari. Pocca ejedeni iadsa da inad-sapa ¿pocca biquehe onihi onihi iadsa eccoccopadseje? Nohuerani. Huapima iadsa da inaridsanitohui.

³³ ¿Nejecojarina Dio icattejidsa-baquijaridenidsa: —Ticcadeni ima bica tejerani —nahijine pajirajari? Ssamo tahi. Dio Attipa: —Jesocristodsa pajissa quinajaridenicca imapi ohuadsa pajiranissa tani —najari. ³⁴ ¿Nejecojarina Dio icattejidsa-baquijaridenidsa: —Najidsohuehuaji

ocasserani ahuamanahitohui —nahijine pajirajari? Ssamo tahi. Jesocristopa itohui pajissa dsoqquejari. Najarina pajissa nahatonijari. Toccamacossanidsapa Imehi Dio inori nahatonihuaaji huittarijari. Nahihuaaji huittaridsa Imehidsa huati huati nanaja najari, ia tohuacahua-baqquihijine. ³⁵ ¿Nejecojarina Cristocca tohuati huanehe iadsa inahuajinijine pajirajari? Nohuerahi. Cristo iadsa huati huana tadsapa iadsa apaja najarahitohui. Ocasserani edsa naqui Cristopa itohui huati cahanari cadsanapojari. Ima najo taniccadsa naco Cristopa itohui huati cahanari cadsanapojari. Nanajidso iquejenadsa, pemi imadidsa, iccoroje imadidsa, oppinehema imadidsa naqui Cristopa itohui huati cahanari cadsanapojari. Idsoqquedsa naqui Cristopa iadsa nama dsanapojari. ³⁶ Dio Atti dsodo nanidsapi ajima najaro:

—Dio, ticca imatohui disseraqquri inadsapi madija huaji-jiradsa ia jara jara quiquinanahi, ijicanijine.

Iapi pohuadenijine pina edede bani tojahijine dsodsoqque nahihuaaji iaccamanajarissa inajaro

—nani nade Dio Atti dsodo nanidsa.

³⁷ Najaro ocasserehe onihi onihi naridsajaro huapima iadsa ssonariraha Cristo iadsa huati cahanari canadsapa iana deni iquejenajaro.

³⁸ Ajijaro imapi obodidsa nahato onani: Dio iadsa huati cahanari canadsapa ima onihi onihi najarojine Diocca tohuati huanehe iadsa inahuajinijine ssamo tani. Idsoqquedsa naqui ¿Diocca tohuati huanehe iadsa amossi napadseje? Diopa iadsa huati huanadsanapo tahi. Aji imadidsa naqui ¿Diocca tohuati huanehe iadsa amossi napadseje? Diopa iadsa huati huanadsanapo tahi. Aja Diocca dosse tabaqquideni naco ¿Diocca tohuati huanehe iadsa inahuajimananijine pajiramanaco? Ssamoqquri nahi.

Ajijaro dsamacca dacoraqquri najarideni naco ssamoqquri nahi. Satana naco pocca dodosse tabaqquidenima ssamoqquri nahi. Jidapanacca ima naqui ssamo tani. Itedsejemacca ima naqui ssamo tani. ³⁹ Memehuari madimanajarideni naco ssamoqquri nahi. Odi bodi huaji tanihuajicca naco ssamoqquri nahi. Dio inahatoridsajari ohuaha ohuaha quinajarideni naco Diocca tohuati huanehe iadsa inahuajimananijine nohuerahissa tahi. Ia Medsede Jesocristo itohui dsoqquejarijine Dio iadsa huati cahanari canahi ahuato inanajaropaji.

9

Diopa Isaraeri potemahi pocca madija toquejenahijine icat-tejidsabaqqujari

¹ Cristocca madija ojadssapi pajissara huati onajaro. Omaidsa-jerani. Dio Corimejine obodi nahato tadsa pajissa huati onajaro. ² Obodi qquedsehe omadi, obodi coma tehe omadi najaro. ³ Occa madija jodideni Jesocristodsa toquejenahijine tohuini onadsapi ohuara ohua ohuaccoradsa Diocca huadie ohuadsa ssonarina, onabote nani. Occa madija tocassiejerahijine Cristodsa epeje onadsa najidsohue jiquejeranihuaji ojanijine bica tani, onaraha ssamo tani. ⁴ Occa madija jodidenipa idi Isaraeri potemahi. Najaridenina Dio pocca ejedenissa inanabaqqujari. Dio pocca dacorehe, pohua dsibehinema pohuadenidsa madiridsajari. Dio pohuadeni tedseje jehe canirejari. Pocca dossenijidsa madimanahijine Moisesidsa huati tajari. Dio Pohuadsa huatidsemanahijine naco mari icanabaqqujari. Pohuadeni tedsejemacca ima bicani huapi tani huati tapojari. ⁵ Occa madija jodideni potapojaridenipa Abarahao, Isahaca, Jacobo quinajari. Najarideni potemahidenidsana Cristo-Mesia tossonajari.

Pohuapa Dio. Huapima Cacahuade tojajari. Pohuadsa etidsedsanaponijine bica tani. Pajissa nema nana.

⁶ ¿Naraha Dio Pohua huati tapojaricca ima bicani pohuadenidsa inapajiranissa tejerajaroqui? Nohuerani. Imapi ajima najarona paji: Isaraeri potemahi huapimapa pajissa Diocca madija quejena-jarahi. Motana Dio pocca madija. ⁷ Abarahao potemahi huapima naco pocca ejedeni pajissacca quejena-jarahi. Motana pocca ejedeni pajissacca quejenajari. Diopa Abarahaodsa huati tapo-jari: —Ticca ejedeni Isahaca potemahidsana: “Tia tipotemani” onanitohui —najari Dio. ⁸ Najaro ima imittajaropi: Abarahao potemahi huapimapa Diocca madija toquejena-jarahi. Aja Dio huati tadsa tossonajari potemahidsana: —Occa madija —najari. ⁹ Aja Dio Abarahaodsa huati tapo-jaripa ajama najari: —Huajano ohuahadsa occajonapomadsana ticca amoneje Sara ejedeni cajinitohui —napo-jari.

¹⁰ Nadsapa Saracca ejedeni Isahaca pocca amoneje Rebeca icajidsa inajidsapi idsonidsa ejedeni papamade cajjaro. Imehidenipa icca idi Isahaca pohua ojarihi. ¹¹⁻¹² Ejedeni papamade tocatoja-jaraccadsapa ima bicani inanamana-jeraccani, ima tabaccora tanicca naqui inanamana-jeraccani naraha Diopa pohuadeni tedsejemacca ima Rebecadsa huati tapojari: —Tahidecca tossonajaripa dsotodeccadsa medse tojahitohui —napo-jari. Dio Pohua jipa tahicca inanaridsanijine madija icattejidsabaquijari. Tohuideni huahua najaripa madija pohuadeni inanamanajarojine jerani. ¹³ Dio Atti dsodo nanidsapi ajima najaro: —Ohuapi Jacobodsa ohuati huana tajaro. Esahopa ohuattajojari —nahi nade Dio.

¹⁴ Najaro ima imittadsapi ¿ibodidsa nejecoma inani? Dio pocca tocattejidsaniji pajiranissa tejerani ¿inani-jinequi? ¿Nohuerani! Djojine pajiranissa tani. ¹⁵ Diopa

Moisesidsa huati tajari: —Ohua madija ocattejidsa-baqquijaridenidsana occa acco camehe onanaridsanito-hui. Najaridenidsana ohuati huana tanitohui —najari. ¹⁶ Dio iadsa huati huana tajaripa ia tohuini inajarojine jerani, idsepe ijinissa tajarojine jerani. Dio Pohua huati huana tajarijine. ¹⁷ Pina dsama Ejitocca tamine icattejidsajaricca imassa najaro. Dio Atti dsodo napojarodsa ima anijaro. Diopa taminedsa ajama napojari: —Tiadsa ossonaridsa occa dacorehe ahuato onananijine tia tamine onanajaro. Nema onajaropi dsama huapimadsa otahimari mittaridsamanahijine —nahi nade. ¹⁸ Najaro imadsapi iadsa ahuato tani: Dio Pohua jipa tadsa madijadsa: —Occa —nadsapa najaridsana huati huana tajari. Naraha Dio jipera tadsa madijadsa: —Occa —najaradsapa Pohuajine madija paja tohuiborihidi dsanapo tahi.

¹⁹ Najaro ima nahatoto tinadsapi ajima tiquinanitide: —Dio Pohua jipa tahicca ima madijajine cacajiquimerani ssamo tadsapi ¿nejecotohui Diopa Pohuadsa iboqquri najaridenidsa: “Ticcadeni ima tabaccora tani” nanaja najari? —tiquinanitidija. ²⁰ Naraha nema tiquinejeraji. Tiadenipi madijaraha ¿nejecotohui Diodsa tettideni nema najaro? Ajina dsipapi attini caji-jeraraha poni nanahatodedsa: —¿Nejecotohui ohua tinahatodsa ajima onajaro? —¿nanijinequi? ²¹ Naraha dsipa nanahatodena ssiqui jarorodsa pohua jipa tahicca ihinahato najaro. Najaro ssiqui jarorodsa dsipa bicani inahato, dsamatapa tabottojine inahato naneje najaro.

²² Dio naco pina dsipa nanahatodessa naha Pohua jipa tahiccara ihinana najaro. Ajana Pohuapa: —Madija Ohuadsa iboqquri najaridenidsa occa huadie onassonarina, nani occa dacorehe ahuato onananijine —najari. Najarideni nanajidso toquejena-dsanapohuijine inana-jorabaqquijari. Diopa nama nahijine jipa taraha po-

huadeni inajidsobaqquihijine najoccahi. Mohuaradsa poccadeni imasiri inahanaccani. ²³ Pohuapa najoccad-sama iadsa huati canahari canadsa ia tonassiajabacquihi-jine ia tonanajora-bacquiari. Pocca deni tojehe, pocca biquehe iadsa ahuato inananijine tohuini nadsa nema inanajaro. ²⁴ Ia motapi jodiodeni iquejenajaro, motapi jodio tiquejena-jerajaro huapima Dio pocca madija iquejenanijine ia huahua tabacquiarijapaja. ²⁵ Najaroa aji Dio Atti cacomerabote Osea dsodo inapojarodsa ima ajima najaropaji:

—Ocra madija quejena-jarajaridenidsa: “Ocra madija” onanitoahui.

Pohuadenidsa ohuati huanera tajarossa naporaha pohuadenidsa ohuati huana tanitoahui.

²⁶ Nadsapi pohuadeni madimanahihuaji pohuadenidsa: “Ocra tiquejena-jerani” onaporaha

najaro dsamadsa pohuadenidsa: “Dio camitta tajaricca ejedeni tiquejenani” quiquinanahitoahui

—napohui nade Dio Atti Osea dsodo inajaro. ²⁷ Dio Atti cacomerabote Isahiapa Isaraeri potemahi jodiodeni tahimari huati tapojari:

—Isaraeri potemahideni tohuapidsapa pina coridsa imenicca ssiqui potera tajaro jiquejerajarossa quinahitoahui

naraha mota pamema nahana tocassiejerahitoahui.

²⁸ Aja Dio Pohua huati tapojaricca inanabote nani.

Dsama huapimacca madijadsa najidsohue inanadsapi Pohuajine pohuadenidsa pajiranissa tanitoahui
—nahi nade.

²⁹ Isahia ima dsodo inapojaro naqui ajima najaro:

—Dio Dacorabote icca idideni potemahi mota ecahuabaqqui-jaradsapa

iapi pina odsa panani Sodomacca madija, Comoracca madija jicajarissa inanitohuiraha — nahi nade.

Jodiodenipa: —Icca marinaja ecahuadsapi Diodsa ibicani-jine —quinaraha

³⁰ Ima nema nadsapi ¿nejecoma inanijine? Tahide jodio quejena-jarajaridenipa: —Icca ima Diodsa tobicana —quinapo-jararaha Jesocristodsa pajissa quinadsapa Dio pohuadenidsa: —Ticcadeni imasiri ohuadsa nohuerani —najari. Nadsapi poccadeni ima Diodsa tobicajaro. ³¹ Naraha Isaraeri potemahi jodiodenipa poccadeni ima Diodsa tobicanijine Moisesicca marinaja inapajiramananijine disseraquiri naraha pajiramana-jarahi. ³² ¿Nejecotohui jodiodenipa Diodsa tobicamana-jarajari? Pohuadenipa ima bicani inanamanajarodsa Diodsa tobicamanahijine tohuini quinaraha najarodsa tobicamana-jarajari. Diodsa pajissa quinahissa tajarajari. Poccadeni imapi pina sibadsa madija cobara tocanirejarissa quinarajari. ³³ Najaropi Dio Atti dsodo napojarodsa ajima najaro: —¡Ticattomama canaji! Odsa panani Siohuajipi siba ohuattajaro.

Najaro sibapi madija inehedimabaquihitohui.

Najaro sibadsa pajissa quinajaridenipa nidsa dsotode ponicca mamaidsa tabaqqi toquejena-jarahitohui —naponi nade Dio Atti dsodo nanidsa.

10

¹ Ohuemecotedeni, occa madija Isaraeri potemahi jodiodeni tocassiejerahijine obodi tohuini onajaro. Dio inassiajabaquihijine Pohuadsa huati huati ohonanajaro. ² Ohuapi poccadeni ima nahato onajaro. Pohuadenipa Diodsa disseraquiri naraha Diocca nahatohue pajissacadsa bodideni huatohuissa tajarahi. ³ Dio Pohua ojarajarina madijacca ima inanabicanijine pajirahi pohuadenipa

ssamoqquiri najari. Poccadeni ima Diodsa bica tanijinepi poccadeni marinajadsara disseraqquri najari. Naraha Dio madija inanabica-baqquihijinecca imadsapa iboqquri najari. ⁴ Moisesicca marinaja huapimapi Cristo inapajiranissa tadsapi jicajaro. Nadsapa madija Jesocristodsa pajissa quinajaridenicca ima Diodsa tobicajaro.

⁵ Aja madija poccadeni ima Diodsa tobicanijine poccadeni marinajadsa disseraqquri najaridenicca imapi Moisesi dsodo inapojaro: —Ajijaro marinajassa inanadsa madijaripa najaro marinajadsara madihitohui —nahi nade. ⁶⁻⁷ Naraha icca ima Diodsa tobicanijinepi icca jehenijina paji. Pina Moisesicca dsodonijissa najaro tibodidenidsa ajima tiquinanitide: —¿Nejecojari memehuaji toccamacossahijine pajirahi? ¿Nejecojari nami odini huaji tanihuaji jicapojarideni madimanahidsa toccaronahijine pajirahi? —tiquinaraha nema tiquinejeraji. Cristotohui memehuaji jaijamacossa-jerani. Jicapojaridenihuaji naqui jaijarona-jerani. ⁸ Moisesicca dsodoniji onihipi ajima najaro: —Najaro ima tiadenidsa huajira tani. Tibodidenidsa ticajimanani, huati tiquinanijine tejeridenidsa najorani —nahi nade. Najaro imapi Jesocristodsa pajissa inadsa icca ima Diodsa tobicanijine. Najaroa aji mari mari ihinanajaropaji. ⁹ Madijadsa tecomeramanadsapi: —Jesopa ohua Medsede, occa tamine deni tojahicca —tiquinaji. Tibodidenidsa naqui: —Jeso huatiaraha Dio inahatonijaripa pajissa —tiquinadsapi ticassiejeranitohui. ¹⁰ Ibodi Jesocristocca imadsa pajissa inadsapi icca ima Diodsa tobicajaro. Madijadsa ecomeradsapi: —Jesopa ohua Medsede —inadsana Dio ia tonassiajajari.

¹¹ Dio Atti dsodo napojarodsapi ima ajima najaro: —Pohuadsa pajissa quinajaridenipa nidsa dsotode pocca mamaidsa tabaqqi toquejena-jarahitohui —nani nade.

¹² Najaria jodiodenipa, jodio quejena-jarajarideni tedseje

najarissa caniqquimerajaripaja. Ia Medsedepa pohua ojarijari, huapima Medsededeni. Madija pohuadsa huahua quinajarideni accode jipa tajari. Pocca biquehe jiquejeranicca pohuadenidsa dade jipa tajari. ¹³ Dio Atti dsodo nanidsapi ajima najaro: —Huapima ia Medsede onidsa huahua quinadsapa tocassiejerahitohui —nani nade Dio Atti dsodo nanidsa. ¹⁴ Naraha ¿nejecoma quinadsa pohuadsa huahua quinahijine? Pohuadsa pajissa quina-jaradsapa pohuadsa huahua quinahijine ssamoqquri najari. ¿Nejecoma quinadsa pohuadsa pajissa quinahijine? Pohua tahimari mittamana-jaradsapa pajissa quinahijine ssamoqquri najari. Naraha ¿nejecoma quinadsa pohua tahimari mittamanahijine? Pohuadeni maride cappiramanadsapa pohua tahimari mittamana-jarajari. ¹⁵ Nadsapa ¿nejecoma nadsa pohuadeni maride tojahijine? Mamaride dossede nohueradsapa maride toja-jarahi. Najaroa aji Dio Atti dsodo napojarodsapi ajima najaro: —Madija ima bicani icassiejeranijinecca maride bacco nadsapa huatidsehe tojaridsani —nani nade.

¹⁶ Naraha madija huapimapa icassiejeranijinecca ima bicanidsa pajissa quina-jarahi. Pina Dio Atti cacomerabote Isahia huati tajarissa najaro: —Ohua Medsede ¿nejecojarina icca imadsa pajissa najari? —napohui nade.

¹⁷ Nadsama Jesocristodsa pajissa quinahijinepa tahide pohua tahimari icassiejeranijinecca mittamanadsana pajissa quinajari.

¹⁸ Naraha ohuattipi: ¿Isaraeri potemahidenipa najaro ima bicani mittamana-jaraco? onaraha mittamanahi. Dio Atti dsodo napojarodsapi ajima najaro: —Najaro imapi dsama nemanehedsa mittaridsamanajari. Dsama huapima jicaquinihuaji naqui bacco taridsa-jaropaji —nani nade Dio Atti.

¹⁹ Nadsapi ohuatti onihi naqui: ¿Najaro ima Isaraeri potemahidenipa bodidenidsa mittamanahissa tajaraco? onaraha nahatoqquiri nahi. Moisesicca dsodonijidsa Dio Attipa:

—Isaraeri potemahi tiadenipi nidsa ticcadeni madija quejena-jarajaridenidsa ohuati huana tani qqui tiquinadsapi tedimananitohui.

Madija ohuadsa ssamoqquiri najarideni ohuacahuabaqquih qqui tiquinadsa naqui pohuadenidsa tedimananitohui —nahi nade.

²⁰ Dio Atti cacomerabote Isahia naco cappinera tadsa Dio Atti ecomerajaro:

—Madija ohuahadeni naco Otohui quina-jararaha Ohuadsa bacco toquinajari.

Otohui quina-jararaha occa ima pohuadenidsa ahuato onanajaro —nahi nade Dio.

²¹ Isahiapa Isaraeridenicca ima onihi Dio huati tadsa ecomerajaro:

—Occa madija odinibaqquihijine huajjiradsa pohuadenidsa huahua ohonanaraha iboqquiri nahi.

Poccadeni ima nebomanahijine jiperaqquiri najari —nahi nade Dio.

11

Diopa Isaraerideni icattejidsabaqquijari

¹ Jari, huati onana: ¿Diopa pocca madija Isaraeridenidsa huattajo taco? Nohuerahi. Aji ohuapi Isaraeri potemahi jodio ojani. Occa idipa Abarahao. Najari jinodi Benjamin potemahicca madija ojani. ² Tahidedsama Diopa Isaraeri potemahidenidsa: —Occa madija —najonajaria aja jidapana pohuadeni ettajobaqqui-jarajaripaja. Dio Atti dsodo nanidsa Pohua Atti cacomerabote Eria

tahimari nahatoqquiri tiquinajaro. Maittaccadsama Isaraeridenicca ima bica tejeradsa Eria Diodsa huati tajari: ³—Ohua Medsede Dio, ticca madija Isaraeridenipa Tetti cacomeraqquiri najarideni inajicaridsamanahi. Aji siba hua tamaroni Tiadsa dada toqquimacca naqui itaboridsamanani. Ohua naqui ohua inanadsoqqemananijine tohuini quinaraha ohua motta omadiccani —nahi nade Eria Diodsa. ⁴ Naraha Diopa Eriadsa huati tajari: —Madija mota 7 mil (7,000) quinaha ocajini, ohuattajobaqqui-jarajari. Pohnuadenipa dio pohnuamacca Bahao corimedsa huatidsemana-jarahi, pohnuadeni pitodsa jassi jassi tajarahi —nahi nade Dio Eriadsa. ⁵ Jidapana naco najarideni potemahi mota pamema naha Dio nebomana-jarajari. Diopa bica taja, huati huana taja najarijine icattejidsabaqquijari. ⁶ Dio bica tajarijine icattejidsa-baqquijaripa madija pohnuadeni inanamanajarojine jerani. Nassa pohnuadeni inanamanajarojine Dio icattejidsa-baqquidsapa ettipi: —Dio bica tajarijine —in-ejeranitohuiraha.

⁷ Nadsama ¿Isaraeridenicca imapi nejecoma najarona paji? Pohnuadenipa Diodsa bicaqquiri nahijine tohuini quinaraha najaro ima bacco toquina-jarahi. Mota pamema naha Dio icattejidsa-baqquijaridenina Pohnuadsa bicaqquiri najari. Motapa paja huaribodeni tosibarihi najari. ⁸ Dio Atti dsodo nanidsapi ajima najaro:

—Diojine bodideni pina huada cojo tocanirejarissa quina-jari.

Noccodeni modsi inanabaqquijari, qqui toquina-jarahijine.

Huaribodeni moda inabaqquijari, mittamana-jarahijine.

Najaro ima huarionajaropi jidapana ajijaropaji

—nani nade Dio Atti dsodo nanidsa.

⁹ Tamine Dabi naco najaro ima Diodsa huati tajari:

—Poccadeni jipacquiedsa huahuatidsemana naraha poccadeni jipacquiepi pina tajapadsa ppiro tocanire-jarissa nana.

Nahi tohuedimamanadsapa nanajidso toquejenahijine.

¹⁰ Noccodeni todsidsi-dsanapona, qqui toquina-jarahijine.

Idedeni jocadsamanaha nama dsanapomanana, ocasserani inahanamana-dsanaponijine —nahi nade Dabi.

Jodio quejena-jarajari tocassiejerahijinecca ima

¹¹ Jari, huati onapomana: ¿Jodiodeni tohuedimanajarissa quinajaripa Dio paja ettajobaquirihi najarico? Nohuerahi. Pohuadeni Diodsa iboqquri nadsapa aji icassiejeranijineccapi jodio quejena-jarajaridenidsana tojajaro. Najaro acconi Djoline jodiodeni huadimanadsa: —Ia naqui Diodsa iquejenani-pomana —quinahijine. ¹² Jodiodeni iboqquri nadsa poccadeni ima tossamodsapi madija ohuahadenidsana Diocca biquehe, pocca acco camehe tojaridsajaropaji. Nidsa jodiodeni Diodsa toquejenanihissa tadsapa madija huapimadsa ima bicani denima tojaridsanitohui.

¹³ Naraha jodio tiquejena-jerajaro tiadenidsa huati onajaro. Diopa ohua cadossejari ohuadsa bica tadsa tiadeni maride dissera onajaro. ¹⁴ Najarodsa occa madija motadeni ima bicani ticajimanani qqui toquinadsa: —Jaho, iadsa toja naccaraho —quinadsapa bodideni cacajiqquimera-manahijine. Tossiejehe naqui cajimanahijine, onajaro. ¹⁵ Jodiodeni huahuattajo toquejenajaripa Djoline madija ohuahadenira Pohuadsa cajonerara canajari. Nidsa jodiodenicca ima Diodsa tobicapomadsapi huatidsehe imeni tojanitohui. Pina madija huatiaraha camittermanijarissa quinahitohui. ¹⁶ Ia jodiodeni icca imapi pina pancca imassa najaro. Trigo

bono tahidecca pore quinapojariccadsa pan inahatodsapa sica nahi ime mota badsira taha Diodsa da da ihinanajari. Najari pan ime mota Diodsa tojadsapa namanaha naco Diocca tojajari. Ahua oribo jabo naco Diodsa tojadsapa inine huapima Diocca tojaridsajari. Nadsama icca idi potapojari Abarahaopa pina pan ime motassa, pina oribo jabossa najari. Pohuapa Diodsa tojadsapa pohua potemahideni naco Diocca toquejenajari. ¹⁷ Jodiodeni motapa pina huidsajacca oribo ininessa quinajari. Cacahuadepa oribo inine mota ca ippiridsadsa manaco dsamacca oribo ininera nepi icadsana-ridsajari. Tiadeni Abarahao potemahi tiquejena-jerajaropi pina dsamacca oribo inine nepi cadsana-ridsajarissa tiquinajaro. Nadsapi oribo jabojinena camittaquiri tiquinajaro. ¹⁸ Naraha: —Iana denima bicaquiri inajaro, jodiodenipa ajamani toquejenahi —tiquinejerana. Tibodideni huatoji. Tiadenipi oribo inine tiquejenani. Tijinedenipa oribo camitta tajarahi. Pohua jabojinena camitta tajari.

¹⁹ Tibodideni ajima tiquinanitide: —Jehe, jodiodenipa pina oribo inine ca toppiridsajarissa quinajari. Dio ettajobaqquidsapa iana pocca madija iquejenanijine ia nepi todsanabaquijari —tiquinajaro. ²⁰ Nema tiquinajaropi pajissaraha tibodideni huatoji. Pohuadeni pajissa quinajaradsapa huahuattajo toquejenajari. Tiadenipi pajissa tiquinajarojine Diocca tiquejenaropaji. Nadsama ¡paji! —Iapi deni iquejenani —tiquinejeraji. Dio noppinera ticappinamanaji. ²¹ Diopa oribo inine ca toppi-jarahijine poni najaradsapa ca toppia jicajari. Paji, tiadenidsa pina najaridenidsassa inananana.

²² Nadsama tibodideni huatomanaji. Diopa huati huana tajari, bica tahi. Naraha Pohua naco najidso tahi. Pohuadsa iboqquri najarideni ettajobaquijari. Naraha tiadenidsa huati huana tajari. Pocca tohuati

huanehedsara timadimana-dsanapoji. Nema tiquinejer-adsapi pina ahua inine ca ippiridsajarissa tiquinanitohui. ²³ Naraha jodio bodideni cacajiquimera-manadsa poccadeni ima pajissa quina-jarajaricca nebomanadsapa Diodsa toquejenani-pomahitohui. Dio Dacorabotepa ahua oribo inine ca ippiridsapojari inaccanidsa nepi icadsanani-ridsapomahijine pajirahi. ²⁴ Tienenipi pina dsamacca oribo inine huidsajacca oribodsa nepi cadsanaridsajarissa tiquinajaro. Naraha jodiodeni Diocca madija toquejenani-pomahijinepa Dio Pohuadsa denima bica tajararo. Pina huidsajacca oribo inine ca ippijari inaccanidsa pohua ededsa nepi icadsanani-ridsapomajarissa najaro.

Isaraeri potemahi jodiodeni naco tocassiejerahijine

²⁵ Ohuemecotedeni, ajijaro imapi tahide madijadsa ahuatora taporaha timittamananijine huati onana, nani tibodidenidsa: —Iapi deni iquejenani —tiquinejeranijine. Najaro imapi Isaraeri potemahi jodiodeni mota huapi taha Diodsa tohuibomanajari. Naraha jodio quejenajarajardeni tohuapihissa tadsana jodiodeni poccadeni ibohue nebomanahitohui. ²⁶ Nadsana Isaraeri potemahi jodiodeni huapima tocassiejerahitohui. Najaro imapi Dio Atti dsodo napojarodsa ajima najaro:

—Nidsa odsa panani Siocca ia Idinide ccajonahitohui.

Isaraeri potemahidenicca tabaccorehe inanamossinijine

—nahi nade Dio.

²⁷ Pohua Atti onihi naquijima najaro:

—Nadsana pohuadeni tedseje jehe icanirejaro

onapajiranissa tadsapi poccadeni imasiri onanamossini-tohui

—nahi nade Dio.

²⁸ Jodiodeni motapa pina Diocca huadidenissa quinaccahi. Nema najaroa Jesocristo tahimari icassiejeranijinecca tiadenidsana tojajaro, ticassiejeranijine. Naraha Diopa

jodiodeni potapojarideni icattejidsa-baqqipojarijine po-
 huadeni potemahitohui huati huana tahi paja naccahi.
²⁹ Dio pocca danijipi idini-jerani. Madija huahua in-
 abaqquipojarideni naco inebobaqqi-jarahi. ³⁰ Tiadenipi
 tahide Diodsa iboqqiri tiquinapojaro. Naraha jida-
 pana jodiodeni Pohnadsa tohuibomanadsapa tiadenid-
 sana huati huana tajari. ³¹ Diopa jodiodenidsa na-
 jarossa inanapomanijine. Jidapana Pohnadsa iboqqiri
 najarijine pocca tohuati huanehe tiadenidsa bacco ta-
 jaro. Nidsa dsotode pohnadenidsa naqui pocca tohuati
 huanehe ahuato inanapomanitohui. ³² Madija huapimapa
 najarissa caniquimerajari. Ibohue cajiridsamanadsapa
 Dio inebobaqqijari, ibohuecca imadsa madimanahijine.
 Dio nama nadsapa huapimadsa pocca tohuati huanehe
 ahuato inananiijine.

³³ ¡A, Diocca biquehepi jiquejerani! Pocca nahatohue
 naqui jiquejerani. Pohna bodicca huatohue imittanijine
 ipajira-jerani. Pohna inananicca naqui qqui qqui inaraha
 imitta-jerani. ³⁴ ¿Nejecojari ia Medsede bodi nahato tahi?
 Nohuerahi. ¿Nejecojari Dio bodi acco icamahijine paji-
 rahi? Nohuerahi. ³⁵ ¿Nejecojari pohna cajijaricca Diodsa
 da inadsa: —Dio ohuadsa debe nahi —nahijine pajirahi?
 Nohuerahi. ³⁶ Memecca, namicca huapima aniridsajaripa
 Dio inahatoridsajari. Pocca dacorehedsa huapima ec-
 ahuaridsajari. Huapima aniridsajaridsa Diocca deni to-
 jehe ahuato tajaro. Nadsapi Pohnadsa: —Tiapi deni tijani,
 denima bica tinani. Aja Tiassa najari ohuahapa nohuerahi
 —ihidsanapo nana. Pajissa nema nana.

12

Icca madie Diodsa eccorajarocca ima

¹ Ohuemecotedeni, Dio iadsa huati cahanari canahi
 ahuato tajaro. Najarojine ohuatti bica tadsa tiadenidsa

huati onana, ohuattissa tinanamananjine: Tiadeni tessiredenima Diodsa teccoramanaji. Tibodideni ssiaja, huire tadsa ticcadeni madie dsati Pohuadsa teccoramanadsapi Pohuatohuira timadimanaji. Nema tiquinadsapi tiadenidsa: —Jehe, ticcadeni daniji ohuadsa bica tani —najari. Najaropi Dio Pohuadsa pajissa tetidsemanajarocca ima pajiranissa tajaro. ² Jidapapi ajjaro dsama huapimacca imassa tinanamanapomajeraji. Ajima tiquinanina bica tani: Tibodidenicca huatohue dsati tinanamanaji. Nema tiquinadsapi ticcadeni madie cacajiquimeranjine, Dio jipa tahicca naqui ticahatteranjine. Najaropi bica tanicca ticahattera, Dio tinahatidsemanahijine ticahattera, pajiranissa tanicca tinanamananjine ticahattera nanitohui.

³ Dio ohuadsa huati huana tajaria ohua cadossedsa tiadenidsa huati onajaro. Ponima: —Deni ojani, ohuana nahato onani —tiquinejeraji. Mohuaradsa Djojine nahatoto tinajarocadsa ticcadeni ima nattome tiquinaji. Jesocristodsa pajissa tiquinajaroma tibodideni huatomamanaji. ⁴ Ia huapimapi essire imadijaro. Essire ojariedsa huanaridsanipi huapi tajaro. Naraha huapima najarossa nejerani. Nahatohue onihi onihi nehe cajiridsamanani. ⁵ Ia Jesocristocca iquejenajaro naqui najarossa inajaro. Huapi inaraha Jesocristodsa itassaquidsapi pina pohua assire ojarjarissa inajaro. Iapi ojari ojari inaridsaraha imecotedeni huapimapi ijariquijaro.

⁶ Diopa iadsa nahatohue onihi onihi nehe da inaridsajaro. Pohua jipa tahicca madija ohuahadsa, ohuahadsa da inaridsajaro. Djojine nema nadsapi Pohua Atti huati iquimanijine madijadsa nahatohue da inadsapi najaripa Pohua Atti huati iquimaridsana. Pohua bodidsa: —Pajissa Dio ohuadsa huati tajari —nadsapa Dio Atti huati toquimade tojahijine bica tahi. ⁷ Diocca

nahatohue onihipi madija bijideni acco icamabaqquihijine. Najaro nahatohue iadsa inanadsapi acco icamabaqquihissa tana. Madija mari icanabaqquihijine Dio iadsa inanadsa naqui madija inahattabaqquihijine disseraqquri inana. ⁸ Ettidsa madija bodi inahatidsehijine Dio iadsa inanadsa naqui disseraqquri inana. Madijadsa da inanijine Dio iadsa inanadsa naqui accora inadsa da inana. Quequeriqquimana najari cacahuade Dio iadsa inanadsa naqui disseraqquri inana. Tohuati nahanaqquri najarideni acco camade Dio iadsa inanadsa naqui etidsedsa acco icamabaqquina.

Jesocristocca madija tiquejenajaropi ajima tiquinaji

⁹ Pajissara madija huapimadsa tetideni huanaqquri naji. Tabaccorehedsapi jiperaqquri tiquinaji. Ima bicanitohuina disseraqquri tiquinaji. ¹⁰ Jesocristodsa jehe tiquinajaropi pina tia timecote tedseje tetideni cahanerajarossa tiquinaji. Timecotedeni bica tahicca caji-manapohuijine naco tetidsemanadsa: —Ohuapi dsotode —tiquinana. Timecote ima bicani inanadsa naqui pohuadsa: —Jehe, tijine bica tani —tiquinana. Nema ticanirere canadsapi bica tani.

¹¹ Tidsepedeni ijimananijinepi iboqquri tiquinejeraji. Tibodideni huatidseri nadsa ia Medsededsa tidsepedeni ijimanana.

¹² Aji titedsejemadenicca ima bicanitohui timadimanadsapi huatidsehema timadimanaji. Ocasserani temanadsa naqui mohuaradsa tinahanamanaji. Diodsa huatide naqui tinebomana-geraji.

¹³ Jesocristodsa pajissa quinajarideni cappiramanadsa naco tiadenina pohuadenidsa da tiquinana. Madija ticcadeni odsadsa bacco najonamanadsa naco pohuadenidsa

bicaquuri tiquinaji. Pohuadenidsa: —Nija, jai tijedsimaji. Aja, tijipamanaji. Ajidsa ticahadijanijine bica tani —tiquinana.

¹⁴ Madija tiadenidsa jara jara quinadsa naco tamassomana tejeraji. Ima bicani cajimanahijine Diodsara huati huati tiquinana.

¹⁵ Titessedenidsa ima bicani tojadsapi pohuadeni tedseje tetidsemanaji. Titessedenidsa ima ocassera tanicca tojadsapi pohuadeni tedseje oji tiquinaji.

¹⁶ Ticajonerara canadsa timadimanaji. —Ohuana deni ojani —tiquinejeraji. Pina timecote ajamani toquejenaridenissa tiquinaji. —Ohuana denima nahato onajaro —tiquinejeraji.

¹⁷ Madija tiadenidsa ima inanamanadsa naqui manaco pohuadenidsa ima tinanamana-jeraji. Ima bicani tinanamananijinera disseraquiri tiquinaji. Nadsapa madija huapima ticcadeni madie qqui toquinadsa: —Jehe, poccadeni ima bica tani —quinahijine. ¹⁸ Madija huapima tedseje ticajonerara canehe timadimananjine disseraquiri tiquinaji. ¹⁹ Ohuemecotedeni, tiadenidsa ohuati huana tani. Madijajine tiadenidsa ima ssonaridsapi: —Manaco —tiquinejeraji. —Ohuacconepa Diona inajidsobaquihitohui —tiquinaji. Dio Atti dsodo nanipi ajima nani: —Poccadeni najidsohue manaconipi Ohuana pohuadeni onajidsobaquihitohui —nahi nade ia Medsede. ²⁰ Pohua Atti dsodo nani onhipi ajima nani: —Tiadsa huadi tajari pemidsa naco jipahijine da tinajo. Bacco dsaridsa naco dse nahijine passo da ticanaji. Nadsapa jabojojsa tocomehidsapa pano tomacchui nahitohui —nani nade Dio Atti dsodo nanidsa. ²¹ Ima tabaccora tajaro tiadeni ajimani tonana-jeranjine disseraquiri tiquinaji. Ima bicani tinanamansapi tabaccorehena ajimani tojanijine.

13

Ajjaro dsamacca tamededeni attidenidsa iboraqqiri tiquinaji

¹ Ajjaro dsamacca tamededeni huapimapa Diojine dossehe cajimanajari. Dio tamine inajaradsapa tamine toja-jarahi. Najarojine madija huapimapa tamededenidsa iboraqqiri nahijine bica tani. ² Naraha madija tamededenicca cacahuehedsa huattajoqqiri najaridenipa Diocca dossenijidsa naco huattajoqqiri najari. Najarojine pohuadenidsa najidsohue sssonari najaro. ³ Tamededenipa madija ima bicani tonanamanajarideni inajabojeri-baqqihijine jahi. Madija ima tonanamanajaridenina inajabojeri-baqqihijine. Tamine noppinedeni ticappinamanajeranijinepi ima bicanira tinanamanaji. Nema tinanamanadsana ticcadeni taminepa tiadenidsa: — Ticcadeni ima bica tani —nahitohui. ⁴ Ticcadeni taminepa Diojine dsepe ijijari tiadeni cacahuade. Naraha tabaccorehe tinanamanadsapi ticappinamanaji. Taminepa pahuama dosse dosse najarajari. Diocca dosseniji cajidsapa madija ima inanamanajaro manaconipi pohuadenidsa inassonari tani. ⁵ Nema nadsapi tamededeni noppine ticappinamanadsa attidenidsa iboraqqiri tiquinaji, nani tiadenidsa Diocca najidsohue ssonari-geranijine, tibodideni bica tanijine. ⁶ Nema nadsapi ticcadeni dsama ecahuamananijine tamededeni ticcadeni dsiniro motatohui huati toquinadsapa pohuadenidsa da tiquinaji. (Najaro dsiniro mota caria attidsapi: impuestos, quinajari.) Aji dsiniro inequeriquimanajaropi tamededenicca tarabaisa tojanijine. Dio jipa tadsa ticcadeni dsama cacahuade dsepedeni ihijimana najari.

⁷ Madijadsa debe ticajimanadsapi pajiranissa tanicca da tiquinaji. Taminedsa dsiniro mota impuesto debe tiquinadsa naqui da tiquinaji. Impuesto onihitohui huati toquinadsa naqui da taquimanaji. Tamine noppine ticappinamanadsa pohua atti naqui mohuaradsa timittamanaji. Pohujine ima bica tadsa naqui pohuadsa: —Jehe, tijine bica tani —tiquinana.

Tohuati huanehe pajissacca

⁸ Madijadsa debe tidsanapomana tejeraji. Naraha debe ojarie ticajimana-dsanaponijinepi tohuati huanehe, aji tinoridenicca huapimadsa tetideni cahanerara canaridsanijine. Nema tinanamanadsapi Diocca dosseniji nemaneha tinapajiramananissa tajaro. ⁹ Diocca dosseniji Moisesidsa da inajaro motapi ajima najaro: —Madija ohuahacca amoneje tija tejeraji. Amoneje naqui maqquideje amoneje cajijari tinaja tajarajo. Madija naco tinanadsoqqe tajarajo. Tiboti tejeraji. Madija cajijaricca tohuini tejeraji —najaro. Diocca dosseniji mota denima huapi taraha huapima tassaquidsa ojarie tojadsapi ajima najaro: —Tinorideniccadsa tetideni huanaqquri naji, pina tiadenidsa tetideni huanaqquri najarossa naji —nahi nade. ¹⁰ Tinorideniccadsa tetideni huanaqquri nadsapi pohuadenidsa ima tinanamana-jeranitohui. Tetideni cahanerara canehe timadimanadsapi Diocca dosseniji nemaneha tinapajiramananissa tajaro.

¹¹ Nema tiquinaji onajaropi icassiejeranijinecca huada huajirajonani. Tahide Jesocristodsa pajissa inapodsapi: —Ia tohuaccamacossani-baqquihijinecca huada huaji taccani —inaporaha jidapapi huajira tani. Tibodideni huatomanaji. Ticahadijajarossa naporaha jidapapi nocco tiquejenaji. ¹² Dsidsini jicajonani. Ssijajonani. Dsidsinicca imapi inebona. Pina eterobote ssiti coro

inajarossa inana. Nadsapi ssiajanira edsana. Pina etero dsati edsajarossa inana. ¹³ Jidapapi mohuaradsa imadina, pina madija ssiajanidsa madimanajarissa inana. Comani eridsa-jerana. Mohua mohua inaridsa-jerana. Huananehe inana-jerana. Imecca tohuini inajarodsa imadijerana. Huadiedsa naqui ahuaji atti ahuaji atti inejerana. Madija cajijari acconi naqui edijerana. ¹⁴ Ajima tiquinanina bica tani: Ia Medsede Jesocristocca dacorehera tedsamanaji. Aji tibodidenidsa tohuini tiquinanicca tabaccorehe naqui tinanamana-jeranijine ponide dacoco tijiraji.

14

Timecotecca imapi —Bica tejerani —taridsamana tejeraji

¹ Madija Jesocristodsa jehe naraha pocca jeheniji japari tajaro tiadenidsa bacco nadsapa: —Iadsa tiquedsimani bica tani —tiquinaji. Naraha pohua tedseje ahuaji huati ahuaji huati tiquinejeraji. ² Aja imecotedeni motapa: —Bani huapima, dsamatapa huapima ijipani bica tani —quinaraha imecote ohuahadenicca jeheniji japari tadsapi: —Bani ijipani oppina tahi —quinajari. Nadsapa dsamatapara jijipamana najari. ³ Nadsama bani, dsamatapa huapima jipamanajaridenipa aja bani jipamanajarajaridenidsa: —Ssamoququiri tiquinani —quina-jarana. Bani jipamana-jarajarideni naco pohuadeni imecotedenidsa: —Bani tijipamanadsapi ticcadeni ima bica tejerani —quina-jarana. Tetideni ajimamana tejeraji: Diopa timecotedeni huapimadsa: —Occa madija —najari. ⁴ Nadsama madija ohuahacca medsedsa: —Tijine bica tejerani —¿tiquinanijinequi? Najaropi ticcadeni ima jerani. Pohuajine ima bica tadsa, bica tejeradsa pohua medsedena pohuadsa huati tahijine. Najaro imassa najaro timecotedenicca ima nattome tiquinani bica tejerani. Ia

Medsede pohuana madijacca ima inanabicanijine pajirahi.

⁵ Madija mota naco: —Iapi ajjaro huadadsara Diodsa etidsenijine bica tani —quinaraha mota attidenipa: —Huada huapima najarossa caniqquimerajaro. Huajjiradsa Diodsa ehetidse najaro —quinajari. Madija pohua pohua bodidsa ima bica tanicca icattejidsadsapi najarossa inanani bica tani. ⁶ Imecotedeni motapa: —Ajjaro huadapi Diodsa etidsenijine icattejidsajaro —quinajari, Diodsa bica inanamananijine. Imecotedeni motapa bani, jijipa huapima jipamanajari. Diodsa bica inanamananijine nama quinadsapa Diodsa: —Ticca daniji bica tani —quiquinanajari. Imecotedeni motapa Diodsa bica inanamananijinepi dsamatapara jipamanadsa Diodsa: —Ticca daniji bica tani —quiquinanajari.

⁷ Iapi ia tohuini inanicca tohuira imadi-gerani. Idsoqquenijine naqui ia tohuini inanicca jerani. ⁸ Imadiccadsapi ia Medsede inahatidsehijine imadijaro. Idsoqquedsa naqui pohuadsa imadinijine. Nema najaroa aji imadidsa, idsoqquedsa ia Medsedecca iquejenajaropaji. ⁹ Najarotohui Cristopa dsoqquejari. Nahatonidsapa madipomajari. Puhuapa jicajarideni, camittaquiri najarideni Medsededeni tojajari.

¹⁰ ¿Nejecotohui timecotedsa: —Ticca ima tabaccora tani —tiquinajaro? ¿Nejecotohui pohua ajamani tinamanajari? Iapi huapima Dio tedsejema idomo huanitohui. Nanidsa icca ima huapima Puhuana icattemanitohui.

¹¹ Dio Atti dsodo nanipi ajima najaro:

—Ohuapi pajissa omadini. Ohuatti naqui pajissa —nahnade ia Medsede.

—Madija huapima otedsejema pohuadeni pitodsa jassi tahitohui.

Huapima attidenipa: “Tiana deni tijani, bica tinani”
quinahitohui —nahi nade.

¹² Nidsa nanihuajipi ia huapima icca madiicca ima ia mottacca Diodsa ecomeranitohui.

Timecotecca ima tinassamomana tejerana

¹³ Nadsapi timecotedeni tedseje: —Ticca ima bica tejerani —ticanirere cana-jerana. Ajima tiquinanina bica tani: —Ohuemecote imasiridsa onehedima-jarahijine ohua ohuacahuana —tiquinaji. Timecotecca jeheniji tinassamo-jeranjine tia tiara ticca madie tecahuaji, onajaro. ¹⁴ Ohuapi ia Medsede Jesocristocca ojajarojine obodidsa nahato onajaro: Dsamatapa, bani oppina tahicca nohuerahi. Naraha madija bodi: —Ajajari bani ojipani-pi Diodsa oppina tahi —nadsa jipadsapa Diodsa bica tejerani. Pohuadsa pina imasirissa najaro. ¹⁵ Nadsapa timecotedsa oppina tahicca pohua qqui tadsa tijipadsapi jabojo tinanahitohui. Pohuadsa oppina tahicca tijipajaropi pohuadsa jipera tinajarossa najaro. Cristopa timecotetohui naco dsoqqejari. Paji tijipajarocca imadsa pocca jeheniji tinassamorana. ¹⁶ Cristojine tiadsa oppinera taraha madija ohuaha attidenipa: —Tijine bica tejerani —quinarana. Nama quina-jarahijine tia tecahuaji. ¹⁷ Diocca cacahuehepi ijipanicca, dse inanicca jerani. Pocca cacahuehepi Pohua Corime ia acco camadsa imasiri jirehe imadinissa tajaro, jonehedsa imadijaro, etidseri naridsajarona paji. ¹⁸ Jesocristocca medse iquejenadsapi najarossa inanadsa imadinijine. Nadsana Dio iadsa huatidsehitohui. Madija naco: —Bicaqquri tiquinani —quinahitohui.

¹⁹ Imecotedeni huapima icajonerara cananjine, icca jeheniji denima todacorani nanijine naqui disseraqquri inana. ²⁰ Diojine timecote madihissa tajaricca ima tijipajarodsas tinassamo tejeraji. Iadsa jijipa oppina tahicca

nohuerahi. Huapima bica tahi. Naraha ia ijipajarodsa imecotecca jeheniji tossamojarona Diodsa bica tejerani. ²¹ Icca ima bica tanijinepi imecote inehedima-jaradsana bica tani. Pohnadsa bani jipahijine oppina tadsapa najari bani ijipa-gerana. Dsedse inocco jano tanicca naqui dse inejerana. Imecote inehedimahijinecca ima onihi anidsa naqui najaro inana-gerana. ²² Tibodidsa: —Pajissa oppinera tahi —tadsapi najaro tibodidsara nahato tinaji. Diopa tibodi nahato tahi. Madija pocca imajine pohua bodi ocassera tajaradsapa huatidsehema madijari. Pocca ima bica tani nahato tajari. ²³ Naraha madijapa: —Ajajari ojipadsa ¿bica taqui? ¿Bica tejeraqui? Ssamo onani —nadsa jipadsapa Diodsa bica tejerani. Pocca jeheniji pajiranissa tejeradsa Diojine oppinera tahi ssamo tajari. Ssamo taraha nama naha jipadsapa pocca ima bica tejerani. Madija pohua bodidsa: —Ajima onanadsapi Diodsa tabaccora tani —naraha nama naha najaro ima inanadsapi imasiri cajijari.

15

Tinoridenicca tinahatidse-baquimanahijine bica tani

¹ Imecotedeni motapa Dio jipa tahicca ssamoqqiri najarijine poccadeni jeheniji japari tajaro. Naraha ia icca jeheniji dacoradsa pina acco icamabaqquina. Poccadeni ssamohue mohuaradsa inahanana. Ia ia inahatidsenira ojari-gerana. ² Ia huapima inoridenicca inahatidsebaqquhina bica tajaro. Poccadeni ima tobicanijine, poccadeni jeheniji naqui denima todacoranijine disseraqqiri inana. ³ Cristopa pohua pohua nahatidsehijine bodi huato-jarajari. Nama najaripa Dio Atti dsodo napojarocca pohnadsa tojajaro. Najaropi ajima najaro: —Abi, Tiadsa tatamasso quinajaridenicca tamassohue ohuadsa naqui ssonarini —najari. ⁴ Maittaccadsama Dio Atti dsodo

quinapojaropi icahatteranijine dsodo quinajaro. Najaro iadsa huarijonajaro hua inadsapi ia acco camajaro, Diodsa disseraqqiri inanijine. Imittadsa naqui etidsejaro. Nema nadsapi itedsejemacca ima bicani icajinitohui nahatoqqiri inajaro. ⁵ Dio Pohnadsa disseraqqiri inanijine, etidsenijine Pohnana iadsa inanajaro. Pohnapa tiadeni acco tocamabaqqidsa timecotedeni tedseje ticajonerara canehe timadimananijine. Pina Jesocristocca madiessa tinanamananijine. ⁶ Nema tiquinadsapi tiadeni huapima tijariqqimanadsa tettideni ojariqqidsa ia Medsede Jesocristocca Abi Diodsa jiri jiri titiquina nana.

Ima bicanipi jodio quejena-jarajaridenidsa bacco taridsajaro

⁷ Nadsama Jesocristodsa jehe quinajaridenidsa: — Itesse tiquejenani bica tani —ticanirere canaridsana, pina Cristo tiadenidsa: —Ohuadsa tiquejenaji —najarissa tinanamanaji. Nema tinanamanadsapi Diocca deni tojehe ahuato tinanamananitohui. ⁸ Tiadenidsa huati onajaro. Cristo jodiodeni acco icamabaqqihijine ccajonajaripa Dio icca ididenidsa huati tapojaricca ima inapajiranissa tanijine ccajonajari. Pajissara huati huati najonajaria Cristojine ahuato tajaropaji. ⁹ Cristopa jodio quejena-jarajaridenitohui naco ccajonajari, Diocca tohuati huanehe qqui toquinadsa Pohnadsa huatidsem-anahijine. Najaro imapi Dio Atti dsodo napojarodsa ajima najaro:

—Jodio quejena-jarajarideni madimanahihuaji “Diopa bica tahi” onaridsanitohui.

Tia oni deni tojajaro mittamanahijine naqui jiri jiri onaridsanitohui —napohui nade.

¹⁰ Dio Atti dsodo napojaro onihi naqui:

—Jodio tiquejena-jarajarodeni Diocca madija tedseje Diodsa tetidseridsamanaji —napohui nade.

¹¹ Dio Atti dsodo napojaro onihipi:

—Jodio tiquejena-jerajardeni ia Medsededsa tetidsem-anadsa: “Bica tinani, deni tijani” titiquina nana.

Dsama huapimacca madijadeni Pohnadsa huatidsem-anadsa: “Bica tinani, deni tijani” quinana —napohui nade.

¹² Dio Atti onihi Isahiajine dsodo najaro naqui:

—Nidsaranibote Dsesse-Isahi potemahi tamine deni tojahicca tojahitohui.

Jodio quejena-jarajardeni ecahuabaqquihitohui.

“Pohuajine itedsejemacca ima bicani tojanitohui” quinahijine —napohui nade Isahia.

¹³ Itedsejemacca ima bicani jinede Diopa Pohnadsa pajissa tiquinajarodenidsa pocca huatidsehe, pocca jonehe inananidsana. Titedsejemadenicca ima bicanitohui Pohna Corimecca dacorehema timadimanana, onajaro.

¹⁴ Ohuemecotedeni, ticcadeni ima nahato onajaropi madija huapimadsa bicaquiri tiquinani. Djojine naha-toquiri tiquinajaro. Nema nadsapi timecote bodideni acco ticamabaqqui-manahijine tipajiramanani. ¹⁵ Naraha ajijaro ima teppedsa tibodideni acco ocamabaqquinijine ima onihi onihi dacoranicca tiadenidsa dsodo onajaro. Nahatoto tinaraha tetideni ajimamana-jeranjine. Nema onajaropi Dio ohuadsa huati huana tadsa ohuacadossejari. ¹⁶ Jodio quejena-jarajardenidsa ima bicani tojanijine Jesocristodsa odsepe ijijaro. Pina poccadeni Diodsa dada toquimadessa onadsa Diocca ima bicani icassiejeranjinecca mari ocanabaqquijari. Nema onadsapi pohuadenipa pina occa daniji Diodsa da onajarossa quinajari. Najaro danijipi Pohnadsa bica tajaro. Pohna Corime pohuadeni inahirebaqquidsapa Pohnadsa toquejenahissa tajari.

¹⁷ Jesocristo ohua acco camadsapa Dio ohua cadossejaridsa odsepe ijinissa tajarojine ohuatidsejaro. ¹⁸ Ohuatidsedsapi ajijaro imara huati huati onaridsan-itohui: Cristo ohua tonadacoradsapa jodio quejenajarajarideni Diodsa iboraquiri onanabaquijari. Ohu-atti mittamanadsa, occa madie naqui qqui toquinajar-i-jine Jesocristodsa pajissa quinajari. ¹⁹ Dio Corimecca dacorehejine ocanahatoriri canani qqui toquinadsa naco pajissa quinajari. Nema onaridsadsapi Jesocristo tahimari icassiejeranijinecca odsa panani Jerosaredsama mari mari onaridsajaroa dsama Iliriahuaaji bacco onahuajanijaropajide. ²⁰ Ohuapi Jesocristo tahimari icassiejeranijinecca mittamanapo-jarajarideni mittamanahijine tohuini onadsa pohuadeni maride dissera onajarode. Nema onajaropi madija ohuahajine odsa canapirijarodsa odsepe ijinijine jerani. ²¹ Ojinepi pina Isahiajine Dio Atti dsodo napojarossa najaro:

—Pohua tahimari mittamanapo-jarajaridenipa noccodeni ssire-re nahitohui.

Pohua tahimari pohuadenidsa bacco tapo-jeraraha mittamanahitohui —napohui nade Dio Atti.

Pablopa: —Romahuaji occana —najari

²² Madija Jesocristo tahimari mittamanapo-jarajaridenidsa odsepe ijijarojine tiadeni qquide occanijine tossamo-dsanapojarode. ²³ Huajano huapi taha tiadeni qquide occana occana ohonanade. Naraha jidapapi ahuaajicca dsama huapimadsa Jesocristo tahimari ohuacomera-ridsehe jicani. ²⁴ Nadsapi dsama Españahuaji occadsa tiadenidsa ohuibocossaccanijine opajiradsapi nema onanitohui. Nanihuaji tiadeni qqui onabaquidsa ohuatidsedsapi Españahuaji occanijine ohua acco ticamamanana, onajaro, occa benehi pajiranissa tanijine. ²⁵ Naraha

tahidepi odsa panani Jerosarehuaji occaccanijine. Nanihuaji imecotedenidsa acco camehe dsojo onanijine. ²⁶ Aja dsama Masedoniahuajicca, Acaiahuajicca imecotedenipa Jerosarecca imecotedeni cappiramanaha madimanajaridenidsa dsiniro dosse quinajaro. Pohuadenipa cappiramanajarideni acco camade jipaqqiri nadsa dsiniro da inaqquimanajaro. ²⁷ Pohuadeni tohuini quinadsapa huatidsemanadsa nama quinajari. Aja jodiodeni motajine jodio quejena-jarajarideni Jesocristo tahimaridsa toquejenajari. Najaro ima bicani pohuadenidsa tojajaro manaconipi pina jodiodenidsa debe cajimanajarissa quinajari. Najarojine jodio quejena-jarajarideni poccadeni dsiniro mota jodiodenidsa da quinajaro bica tani. ²⁸ Najaro poccadeni da naqquinaja Jerosarehuaji dsojo onadsa bacco onadsapi nahicca Jesocristodsa toquejenajaridenidsa da onanissa tanijine. Nadsapi Espanahuaji occanijine ojoppemanitohui. Nadsa occadsana tiadeni qqui onabaqqunitohui. ²⁹ Nani ticcadeni odsa panani Romadsa bacco onadsapi Cristocca ima bicani ssema tiadenidsa bacco onanitohui.

³⁰ Ohuemecotedeni, ia Medsede Jesocristo onima tiadenidsa huati onana. Dio Corimecca tohuati huanehe iadsa inanajarodsa ohua acco ticamamanaji. Otohui Diodsa huati huati tiquinaji. Ticcadeni huatinaja occa huatinaja tadsajani pina ijariqquijarossa nadsa Diodsa huatide disseraqqiri inana. ³¹ Dsama arobeni Jodeacca jehe quina-jarajaridenicca najidsohuedsa Dio ohua dsori tonanahijine Pohuadsa huati huati tiquinaji. Aja Masedoniadeni, Acaiaidenicca acco camehe Jerosarecca imecotedenidsa da onadsapi huatidsemanadsa: —Jehe bica tani —quinahijine naqui huati huati tiquinaji. ³² Nema tiquinaji onajaropi Dio jipa tadsa occa ima toccanissa

tanijine. Nadsapi ohuatidsedsa tiadenihuaaji bacco onanijine. Tiadeni qqui onabaquidsa obodi jassi nanijine naqui Diodsa huati huati tiquinaji. ³³ Jonehe jinede Diopa tiadeni acco tocamabaquina, onajaro. Pajissa nema nana.

16

Pablopa pohua tesse Romahuaji madimanajaridenidsa nija najari

¹ Imecote Pebe tiadenidsa bacco tanitohui. Ponipi Secreahuajicca Jesocristodsa quequeriquimana najarideni cacahuade. ² Ia Medsede onima ponidsa nija tarid-samanaji. Poni ticatidsemanaji, pina Jesocristodsa iquejenajaro icatidserara cacana najarossa tiquinaji. Poni bijini acco ticamamanaji. Ponipi madija acco icamabaquihui huapi tahi. Ohua naqui ohua acco camade.

³ Prisiradsa, ponicca maqqui Aquiradsa naqui nija onajaro. Pohnadenipa ohua tedseje Jesocristo tahimari maride idsepe ijjarode. ⁴ Ohuadsa ima oppina tehe ssonaribote naraha ohua dsori inanamananijine pohnadenina pohnadeni ccaccoramanadsa topamajonabote najaride. Nadsapi pohnadenidsa: —Epejeni, ohuadsa tijinedeni bica tani —onajaro. Aja jodio quejenajarajari Jesocristodsa quequeriqui-ridsamana najarideni huapima naco Prisiradsa, Aquiradsa huatidsemanadsa: —Tijinedeni ima bica tani —quinajari.

⁵ Prisira, Aquiradenicca odsadsa quequeriquimana najaridenidsa naqui nija onajaro. Otesse bicabote Epene-todsa naqui nija onajaro. Pohnapa dsama Asiahuajicca madija Jesocristodsa toquejenadsapa pohnana pajissa napojari.

⁶ Mariadsa naqui nija onajaro. Ponipi tiadeni accode dsapani ijinissa tajaro.

⁷ Adonicodsa, Joniadsa naqui nija onajaro. Pohnuadenipa occa madija jodiodeni. Ohuadsama toponi cocorodsa bedsajaride. Pohnuadenipa Jesocristocca dodosse tabaqqi bicaca tajari. Jesocristodsa ojajeraccadsama pohnuadenipa tahide Jesocristodsa toquejenapojaride.

⁸ Otesse Apiriatodsa naqui nija onajaro. Ia Medsededsa iquejenadsapi pohnuadsa ohuati huana tajaro.

⁹ Urbanodsa naqui nija onajaro. Pohnuapa itesse Jesocristo tahimari dsepe ijiridsajari. Estaquidsa naqui nija onajaro. Pohnuadsa ohuati huana tajaro.

¹⁰ Aperedsa naqui nija onajaro. Pohnuadsapi ima ocassera taraha Jesocristodsa dissera tajaricca ima ahuato tajaro. Aristoborocca odsacca madijadsa naqui nija onajaro.

¹¹ Occa madija Herodiodsa nija onajaro. Narosisocca madija Jesocristodsa pajissa quinajaridenidsa nija onajaro.

¹² Trifenadsa, Trifosadsa nija onajaro. Ponideni pamehepi ia Medsededsa dsapanideni ijimanajaro. Persidadsa naqui nija onajaro. Ponidsa ohuati huana tani. Poni naqui ia Medsededsa dsapani ijijaro.

¹³ Rofodsa naqui nija onajaro. Pohnuapa Jesocristocca medse bica tajari. Pocca amidsa naqui nija onajaro. Ponipi pina occa amissa najaro.

¹⁴ Asicrito, Frecote, Hermese, Patroba, Herma quinaridenidsa nija onajaro. Imecotedeni pohnuadenidsa quequeriqquimana najaridenidsa naqui nija onajaro.

¹⁵ Pirorocodsa, Joriadsa nija onajaro. Nereo, pohnuacaripene, Oripa quinaridenidsa naqui nija onajaro. Imecotedeni pohnuadenidsa quequeriqquimana najari huapimadsa nija onajaro.

¹⁶ Tiadeni naqui titesse jehe quinajarideni tedseje bacco ticaniredsapi nija tiquinadsa dama, ticahuajacossa titiquina naji, onajaro. Jesocristodsa toquejenajari quequeriqqui-ridsamana najarideni huapima tiadenidsa nija quinahi.

Paji, marinaja onihi tiadeni tonehedima-baqquirana

¹⁷ Ohuemecotedeni, ticattomama canaji. Tiadenidsa huati onana: Timecotedeni motajine ticcadeni queriqquinajacca ima caroberidsarana. Poccadeni marinajapi pina ticahatterapojarocca marinajassa nejerani. Paji, poccadeni marinajadsa tiadeni tonehedima-baqquimanarana. Nadsapi pohuadenidsa tiajimanani naji, onajaro. ¹⁸ Pohuadenipa ia Medsede Jesocristocca medse quejena-jarahi. Pohuadeni tohuini quinahiccadsara disseraqqiri najari. Attideni naco bica tadsa huati huati quinaraha maidsamanajari. Nama quinadsapa madija ima nattomede ssamoqqiri najarideni icamaidsabaqquimana tahi. ¹⁹ Naraha tiadenipi ia Medsededsa iboraqqiri tiquinani titahimarideni madija mittaridsamanajari. Najarojine ohuatidsejaro. Nadsapi ima bicani tonanade nahatoqqiri tiquinani ahuato tinanamanaji. Naraha ima tabaccora tajaro tonanadepi ssamoqqiri tiquinana, onajaro. ²⁰ Jonehe jinede Diopa pocca huadi Satana ajamani inahahijinecca huada bacco tabote nani. Pohuajine pina temoridenidsa ttai tinanaqquimanajarissa nahitohui. Ia Medsede Jesocristopa tiadenidsa ima bicani inanana, onajaro.

Pablo pohua tessedeni naco romanodenidsa nija quinajari

²¹ Timoteo naco tiadenidsa nija nahi. Pohua tedsejepi Jesocristo tahimari idsepe ijijaro. Occa madija Rosio, Jasona, Sosipateo pohuadeni naco tiadenidsa nija quinahi.

²² Ohuapi Tersio. Ohua naqui Jesocristocca madija tiadenidsa nija onajaro. Ajijaro ima teppepi Pablo huati huati tadsa dsodo onajaro.

²³ Caio naco tiadenidsa nija najari. Pocca odsadsana omadijaro. Pocca odsa Jesocristocca madijadsa accora tajari. Erasto naco tiadenidsa nija najari. Puhuapa ajijaro odsa pananicca dsiniro cacahuade. Imecote Coarto naco tiadenidsa nija najari.

[²⁴ Ia Medsede Jesocristopa tiadeni huapimadsa ima bicani inanana, onajaro. Pajissa nema nana.]

—*Diodsa etidsena* — najari Pablo pocca ima jicanicca

²⁵ Diodsa etidsena. Pocca ima bicani icassiejeranijinecca mari mari ohonanajaropi tiadeni tonadacora-baqquijaro. Najaropi Jesocristo tahimari timittamanajaropaji. Maittaccadsama dsama nahatopo-jeraccadsama Diojine najoraporaha ahuatora tapojaro. ²⁶ Naraha jidapanana tohuatojaro. Pina Dio Atti cacomeraqqiri najarideni dsodo quinapojarossa, pina Dio madidsanapojaricca dossenijissa najaro Jesocristo tahimari dsama huapimacca madijadsa tojaridsajaro. Najarodsa pajissa quinadsapa pohuadsa iboraqqiri nahijine.

²⁷ Diopa ojarijari. Pihuana nahato tajari. Pihuajine Jesocristo tahimari iadsa tojadsapi Dio Pohuadsa etidsedsa: —¡Bica tinani, deni tijani! —ihidsanapo nana. Pajissa nema nana. Epejeni.

El Nuevo Testamento en el idioma Culina (mádija) del
Perú

Kulina: El Nuevo Testamento en el idioma Culina (mádija) del Perú
New Testament

copyright © 2014 Wycliffe Bible Translators, Inc.

Language: Culina (Kulina)

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 14 Jun 2022 from source files dated 30 Nov
2021

4c7c82dd-1f0f-5341-b6e6-26970c27fee2